

四庫全書

集部

欽定四庫全書

御定歷代賦彙卷二十一

地理

霍山賦

有序

唐

皮日休

臣日休以文為命士所至州縣山川未嘗不求其風謠
以頌其文章上發輶軒使得採以聞六年至壽之駢邑
曰霍山山故嶽也邑贅於陞至之二日離邑一舍望乎
嶽將頌之文也及見之則目乎躡手乎躡心乎竦神乎

稽始欲狂其文寫其狀如丹青之不差也頌其風文其
謠如金石之永播也既而其精怯然搏敵躁然械囚紛
然絃絲恍然墮空浩然涉溟幽然久邇則知才智之劣
如耄而加疾將杖而奔者於戲霍山之靈哉霍山之靈
哉將闕於神而愚之邪抑有所達而託之邪其辰旣決
其精忽渝怯然而勝凜然而適紛然而靜恍然而安浩
然而濟幽然而愈如壯而能決將陣而能敵者於是狂
其文寫其狀辭曰

太始之氣有清有濁結濁為山峻清為嶽其山厥臣其
嶽惟君惟南之鎮曰霍為尊嶽之大與地角壯與天勃
勢荆豫華嵩青沂充岱如垤而秀如塊而銳嶽之高千
仞萬仞蒼蒼茫茫日月相避其光望之數百里外為天
棟梁嶽之尊端然御極竦然正位靜然而聽凝然而視
其體當中如君之毅其屬者如駢其拇如枝其指若卑
其儀若肅其位嶽之氣其秀為春其清若秋其翠如雲
雲不能麗其色如煙煙不能鮮若雨收氣爽丹青滿天

嶽之靈其神不昧其報如響若雨用淫嶽能廓之若歲
用旱嶽能澤之嶽之德生之育之煦之和之開蔭染卉
淒淒迷迷蕩續數百里嶽之形有雲騖騖其勃如怒有
泉烈烈其來如決叱豐隆奔列缺轟然霹靂天地俱裂
嶽之異狀其勢如危或不可支若不可維或仰而呀有
如吮空或俯而拔有如攫地其曉而東有如貫日其暮
而西有如孕月有水而脈有石而骨有洞而腹有壑而
節或銳而勵或斷而截或迴而馳或低而折其經之怪

之祥之詭之千種萬類繁不可得而詳記因神狂不能
自主殆而寐夢一人絳衣朱冕怪貌魁形曰余祝融之
相也夫霍山君之故治也爾賦之誠形矣勝矣怪矣典
矣然義有不備帝俾余莅夫古有五嶽霍居其一所以
五嶽相邇者唐虞之帝五載一巡狩一載而徧上以覲
侯下以存民侯有治者陟不治者黜民有寃者平窮者
濟洎唐虞已降皆燔柴於霍我帝用饗其禮至周旦冊
而命我與諸嶽星列中國自漢之後乃易我號而歸於

衡故祝融遷都命余守霍今聖天子越唐邁虞而廢巡
罷狩余之封內有可陟可黜可平可濟者是聖天子無
由知之爾能以文請執事之達者易衡之號以歸於我
請天子復唐虞陟黜之義故爾之將賦余閉遏爾懷而
不瀾文帝曰有衡既遠有狩必勞惟霍之邇斯號可復
賦者有能言胡不俾帝命余錫爾文爾無忘也臣曰請
惟神命既覺而書嗚呼異哉

九華賦

有序

明
王守仁

九華為江南奇特之最而史記所錄獨無其名蓋馬遷
足跡之所未至耳不然當列諸天台四明之上而乃略
而不書邪壬戌正旦余觀九華盡得其勝已而有所感
遇遂援筆而賦之其辭曰

循長江而南下指青陽以幽討啟鴻濛之神秀發九華
之天巧非效靈於坤軸孰構奇於玄造遷史闕而弗錄
豈足跡之所未到白詩鄙夫九子實茲名之所肇余將
窮祕密於崔巍極玄搜而厯考涉五溪而徑入宿無相

之窈窕訪王生於邃谷淘金沙之清潦凌風雨乎半霄
登望江而遠眺步千仞之蒼壁俯龍池於深窅弔謫仙
之遺跡躋化城之縹緲飲盃孟之朝露見蓮花之孤標
扣雲門而望天柱列仙舞於晴昊儼雙椒之闢門真人
駕雲而獨躋翠蓋平臨乎石照綺霞掩映乎天姥二神
升於翠微九子鄰於積稻炎歊起於玉甌爛石碑之文
藻回澄秋於枕月建少微之星旄覆甌承滴翠之餘瀝
展旗立雲外之旌纛下安禪而步逍遙覽雙泉於松杪

踰西洪而憩黃石懸萬丈之灝灝瀨流觴而紫紆遺石
盤於澗道呼白鶴於雲峰釣嘉魚於龍沼倚透碧之嶠
岫謝塵寰之紛擾攀齊雲之巉削鑑琉璃之浩漭沿東
陽而西歷餐九節之蒲草樵人導余以冥探排碧雲之
瑤島羣巒翳其繆藹失陰陽之昏曉垂七布之沉沉靈
龜隱而復沬履高僧而屨招賢開白日之杲杲試朝茗
於春陽汲垂雲之淵湫凌繡壁而據石屋何丈殊螺髻
之蟠糾梯拱辰而北盼隳遺光於拾寶緇裳迺於黃匏

休圓寂之幽悄鳥呼春於叢篁和雲韶之鷺鷥喚起促
余之晨興落星河於簷櫳護山嘎其驚飛怪遊人之太
早攬卉木之如濯被晨暉而爭姣靜鏡聲之剝啄幽人
劖參葳於冥杳碧雞噉於青林鵬翻雲而失皓隱搗藥
於樛蘿挾提壺餅焦而翔繞鳳皇承盃冠以相遺飲沆
漈之仙醪羞竹實以嬉翔集梧枝之嫋嫋嵐欲雨而霏
霏鳴濕濕於薔蓓躡三遊而轉青峭拂天香於茫渺席
泓潭以擢纓浮桃瀉而揚縞淙淅淅而落蔭飲猿猱之

健狡睨斧柯而昇大還望會仙於雲表憫子京之故宅
疑知微之碧桃倏金光之閃映睫異景於穹坳弄玄珠
於赤水舞千尺之潛蛟並花塘而峻極散香林之迴飈
撫浮屠之突兀泛五釵之翠濤襲珍芳於絕巘裊金步
之搖搖娑羅躑躅芬敷而燦耀金幢玉女之妖嬌蹇龍
鬚於靈寶墮鉢囊之飄飄開仙掌於欽嵌散清馨之迢
迢披白雲而蹠崇壽見參錯之僧寮日既夕而山暝挂
星辰於隆敷宿南臺之明月虎夜嘯而熊咆鹿麋羣遊

於左右若將侶幽人之岑寥迴高寒其無寐聞冰壑之
洞簫溪女厲晴隴而曝禾雜精苓之春苗邀余觴以玉
液飯玉粒之瓊瑤溘辭余而遠去颯霞裾之飄飄復中
峰而悵望或仙蹤之可招迺下見陵陽之蜿蜒忽有感
於子明之宿要逝余將遺世而獨立採石芝於層霄雖
長處於窮僻迺永離乎塵囂彼蒼黎之緝緝固吾生之
同胞苟顛連之能濟吾豈靳於一毛矧狂胡之越獫狁
師局而奔勞吾寧不欲請長纓於闕下快平生之鬱陶

顧力微而任重懼覆敗於或遭又出位以圖遠將無誚
於鴈鷦嗟有生之迫隘等滅沒於風泡亦富貴其奚為
猶榮薜之一朝曠百世而興感蔽雄傑於蓬蒿吾識不
能同草木而腐朽又何避乎羣喙之呶呶已矣乎吾其
鞭風霆而騎日月被九霞之翠袍搏鵬翼於北溟釣三
山之巨鼇道崑崙而息駕聽王母之雲璈呼浮丘與子
晉招句曲之三茅長遨遊於碧落共太虛而逍遙亂曰
蓬壺之藐藐今列仙之所逃今九華之矯矯今吾將於

此巢兮匪塵心之足攪兮念鞠育之劬勞兮苟初心之
可紹兮永矢弗撓兮

黃山賦

有序

明
謝廷讚

余觀近圖經蓋有七黃山云在廣陽有玉室洞留侯辟
穀導引處也延陵俯瞰大江則以假君父子得名姑孰
有劉宋離宮在焉蓋浮丘之尸鄉也東萊為真人洞餘
杭居大滌天柱間孱陵一名謝山其上蓋有謝晦祠云
乃至異域帶方之在忠清者亦且與白岳並峙至於汾

水之源西接錢來漢帝之宮聿在槐里取古今圖牒較言之并此山而七吁亦夥矣不臚而列之觀者厯焉按此山舊名黟山說者曰北九華西彭蠡南接懷玉而東挾漸江起桐汭以盡海壖隕然中居以降勢委和於四表有坤道土德焉故名之曰黃山然余考山海經言三天子都者凡四一則曰在閔西海北一則曰浙江出焉一則曰廬江出焉一則曰南海之內有衡山有菌山有桂山有山名三天子之都焉夫昔之曰天子都者軒轅

也今之曰黃山者亦軒轅也黃山為三天子都明矣指
率山為三天子都者附會蠻中二字之訛指大鄣為三
天子都者附會鄣都二字之訛而天都一峰較著不取
而證之山靈廬胡之日久矣余信宿黃山沐湯泉漱龍
潭暢然有得既取適於杖履復考正乎名山喜而賦之
賦曰

伊軒皇之神聖應雷精而吐靈歷三百而未沫揖浮丘
與容成感嘗草於炎帝著素問之丹經登大隗而迷聖

爰改玉以攸行采靈藥於少華錫黃山之嘉名惟黃山之
萃律頰台目於下風雲中峰而吐瑞氣呼吸而上通
奇屢幻而撫實境本有而翻空泉煦煦而扇煥砂涓涓
而寫紅鳥道靠鬼而倦鳥龍潭風雨而吼龍灞乃尋鳥
氏之逸蹤挈烏衣之舊宗訪五嶽而發軔攜五君以相
從陟砂峰以夷猶望天都以徬徨漱鳴絃於石瀨濯靈
泉以徜徉雖信宿於祥符倏乍陰而乍陽或青天無片
雲或積雪滿高岡或澍雨日滂沱或彤雲接混茫雨則

白氣若嬰珞晴則清風振琳琅於是躋躡羣峰徙倚泉
石巖洞迴幹溪源浙瀝兆諸刹於翠微庶石橋之飛舄
峰則鑪經八甲香送九天獅子則文殊之法座沃若石
人則巨靈之蹠掌歸然服丹霞之紅朮采雲外之杜鵑
乘浮丘之彩雲結容成之紫煙松谷茹乳於疊障黃冠
釀酒於軒轅基石之布子如初鉢孟之聖燈長然石筍
化仙人之岫錦魚躍清潭之淵白馬留芙蓉之跡青牛
下翠微之巔二泉并溫而聖潛紫見二門並峙而石架

雲連聆鸞嘯以上昇攀龍髯以望仙遂使青鸞孤騫而
蹲踞九龍並飛而蜿蜒桃源桃花勾漏朱砂仙都有路
采石無瑕登石柱之石壁臥石牀之石枕松林之石榴
可茹雲際之乳源堪飲紫雲之柏木成帷布水之紅泉
似錦擬太華之髣髴遡蓮花而可諗指九華而結盟媿
顏行而謹凜爾乃峰下有溪峰頭有泉溪為泉委峰即
泉源八巖竄竊而內雲三潭沈瀲而成淵石杓衡而應
斗洞吻叶乎巫山於是汲乳源之布水憩乳巖之長陰

濯湯泉與湯池遡香谷與香林誦浮丘之祕記誌松谷
之妙音規石塔之圓月聆懸溜之鳴琴敬醉石以婆娑
發謫仙之吳吟徒觀其韭深三尺花紅燄山望仙多菊
朱砂長蘭功勞十大於仙人桃花十里於鍊丹二桃則
毛白異色五竹則桂筍獨斑茗大葉而解醒梅先春而
能寒芼石耳苦遮以樂饑服朮葛胡連以駐顏椒麓欽
崎於何不有珍木如雲嘉卉如繡石筍繚亘於文尋瀑
布飛流於前後步疲茶於章亥枚忽恍於隸首固可以

庶中天之髣髴而吞雲夢之八九縱觀其山形之盤礴
水脈之演絡介鼎峙乎三州經彭蠡之巨壑發埭涇旌
魯之源於絃歌總浮曹阮容之流於豐樂豐樂則雲門
之派絃歌則紫石之波匯三山注蕪城而走白下則絃
歌之極涌出屯溪經嚴瀨而止天目則豐樂之滂沱別
有步武橫梅分水東西東界海陽之域西入宮亭之涯
蓋三郭之在經為南岷而少華之巨鎮為東維故百川
襟帶於濫觴而千山毓靈於京坻者乎昔人月旦山川

則曰鬱萃以嵯峨汭淥以揚波人鍾靈於嶽降乃磊砢而英多亦有戰勝毫釐則曰山秀平而水清人感精而廉貞彼兩家之對壘羌騎立而提衡兼茲者具惟黃山與余經筵中信宿蔣公之三徑汪司馬之潘楊在焉披發太函之鴻篇則淵雲之揆藻揚天階也厯芳村而進觀魚宗秀之館許相國之贈言列几席則蕭曹之規隨光鉉台也徘徊巖鎮登九龍池上中天積翠之臺方明入御從司徒之杖屨則園綺之南極綜三槐也登汪川

之壺山挹同姓之芝蘭入石壁之精舍憶康樂之贈言
呈坎即夢鳥之宅唐模此二龍之淵潛川景天官忠愍
之節溪南在黃羅金竺之間昔人云此木即為交讓此
水即為醴泉又云此地有廉泉讓水臣居在廉讓之間
猗與黃山亶其然乎

紫陽山賦

宋 韓 補

承嘉命以宅牧實歛州之故封覽山川之明秀懷典刑
乎晦翁念宣德與流化豈簿書之蒙茸繫先正之闕里

儼紫陽之孤峰非仰高而景行曷淑艾乎厥躬休五夫
之扁室乃締建乎祠宮方營度之云初得良友以獻議
謂城阿之南偏有道院之廢址枕烏聊之形勝挹練溪
之清泚環披雲之諸岫若或朝而或跪臨崇朝而弗勞
遠市廛而弗適稱神靈之幽棲亦藏修之攸止協鵠原
以展勞程工能而錯事曾日月之幾何矗棟宇其中起
屬旃厦之勸誦萃鴻寶之名儒曰緝熙之典學嘗銳精
乎四書既表章乎鹿洞宜敷錫乎扮榆皇穆穆以間納

却紛靡而弗娛奮神毫而染翰婉河洛之龜圖偉四字
之昭揭儼逢掖之所廬炳中天之赫曦昭萬古而莫渝
開羣迷之瞶瞶正流俗之奔趨紛來遊之雋茂明明德
而具學審道體之無窮企模範乎先覺既內美之均具
胡前修之獨卓志萃摯之所志樂顏巷之所樂辨義利
之界限守經訓之邪廓以致知為入門究深造之安宅
苟天爵之尊榮亦何羨乎人爵辭曰山峻嶒兮慨先生
之儀刑水湍駛兮想先生之音聲考亭非遠此戶庭兮

維垣非貴此冠纓兮欲明明德將孰程兮味緒言而自
淑亦先生之復生兮

南山賦

宋張耒

南山巖巖兮其下有人佩玉而握珠刻意魯叟之古經
不習世儒之臆書我頃見之於宛丘貌秀皙而眉疎別
去忽兮幾時面蒼瘠而頷垂鬚愛德器之老成資巧篆
於璠璣問所與之謂誰亦黃槁之仙癯禁八馬之超鶩
同芻豆於羣鷺時慷慨而長鳴恥賤工之附與我行世

之多艱三年困兮江湖幸天恩之放還過都梁兮躊躇
奉兩月之周旋越長淮之馳驅屢飲我於山間挾蹕蹀
之兩姝舟師告余以當行具篙楫於斯須歲方暮而寒
騎犯冰雪於野墟雲漫漫兮垂天風栗栗兮攻膚擗薺
翳於宿莽妍柳秀於羣枯汎羽觴之清冷聊覽物以為
娛思佳人兮天末望莫見兮愁予

柯山賦

宋 張耒

入東門而右回兮原迤靡以相屬拔磅礴以隆起兮是

為柯山之麓其上蕭森而晻靄兮冠萬竿之修竹下硤
确而堅密兮拱高林與喬木散難大於危阨兮雜茅茨
與夏屋通樵漁之溪遂兮路從橫而斷續很土石裂暗
竇谷虛鳴鳥上下伏獸號呼俯江流之蕩潏招列山之
盤紆林巒作態而蔽虧兮風雲效技而卷舒固可以開
闔陰陽於一氣賓饒日月於天衢爰有窮人瞿然無歸
曠四海無所投其足兮古帝命我於山之隈庇蓬茅之
數椽兮撫枵腹而常飢時醉飽而自得兮亦杖履而遨

嬉逾山而東席門草藩爰有君子於茲考槃自種自食
鄰里莫干圖書滿家兒稚飢寒相見輒喜有時不冠寄
萬事於一笑兮不知食糲而衣單吾不加物以一毫兮
亦莫愛人之燠寒悟紛華之多虞兮幸寂寞之至安飲
我薄酒歡有餘啜我豆羹甘而腴隱几而休讀我書乃
曳杖歌曰升柯之巔明遠眺兮築柯之崦可以老兮終
古不忒天之道兮于于而行無喪吾寶兮

八公山賦

梁
吳均

峻極之山蓄聖表僊南參差而望越北邈迤而懷燕爾
其盤桓基固含陽藏霧絕壁嶮巖層巖迴互桂皎月而
常圓雲望空而自布袖以華閭帶以潛淮文星亂石藻
日流階若夫神基巨鎮而卓犖荆河箕風畢雨育嶺生
我高岑直兮蔽景修坂出兮架天以迎雲而就日若從
漢而迴山露泣葉而原淨花照磯而岫鮮促嶂萬尋平
崖億絕上被紫而煙生傍帶花而來雪維英王兮好僊
會八公兮小山駕飛龍兮翩翩高馳翔兮冲天

八公山賦

王永頤

繫八公之勝峙兮儼齒萃以春容壓后土以踞虎兮軼
青霄而騰龍閼神明之嘉址兮實造化之所鍾巖岫紛
其羅列兮若孫拱而子恭控吳楚之形勝兮矯齊秦以
長雄挽淝河之縈帶兮瞰泗水之流東惟登臨以銷憂
兮極瞻眺乎穹窿明艷艷以旁射兮神揚揚而上冲眇
八極之非遐兮緬九重之可通簸萬籟之砢砢兮遠羣
囂之噦喁酣笙鐘於頤洞兮駕彩虹於朗融履蕚巖而

捫蘿兮忘攀陟之為慵攬景光之萬狀兮撐空青之笑
蓉今鸞翔以鳳翥兮忽奔馬而驚鴻猿猱竄而爭嘯兮
晴濤撼乎長松鳥啾鳴而不息兮佳木鬱其龍蔥遂班
荆以少憩乎引壺觴而對客般嘯詠之悠揚兮風雲怪
其動色撫廉頗之瑩兆兮訪春申之臺跡弔仁瞻之忠
魂兮望召南之故宅昔苻堅之南征兮欲卷江以為席
擁熊羆之號闕兮竟臨流以相逼是人事之不周兮抑
天時之有逆何茲山之顯靈兮化草木為戈戟匪風鶴

之徒怪兮乃耳目之為慝哂苻氏之披猖兮成晉玄之
茂績余懷古而感慨兮發再三乎太息羌哀樂之紛集
兮氣交橫於胃臆仍為客使更酌兮杯盤爛其狼籍煙
霏霏以翠橫兮景翳翳以將夕既畢覽而下山兮猶返
觀乎蒼壁爰作賦以自諒兮繼前修於無斁

遊朱方賦

元
朱德潤

丁亥之冬僑寓朱方客有談江山之勝約余重遊焉於
是攜酒肴挹衣躡屨縱步山城之下殘雪既消寒煙弄

晴長江浩瀚海門東傾西連建業北眺廣陵碧樹參差
嵐光相縈浮玉峙於中流焦阜屹其稜層甘露構而多
景扁華陽逸而瘞鶴銘山橫北固水潔中泠西津喧兮
歸渡晚瓜步隔兮風帆輕汨雲濤之千頃實可壯遊觀
而濯襟纓客曰子方登高而望遠蕩瀟灑之心冒獨不
知南徐之舊鎮歷六代而提封晉宋則表其天限齊陳
則矜其地雄梁則金甌無缺吳則鐵甕城空郡實浙西
之障山為江左之衝近有虎跑之泉遠有鶻栖之峰京

峴高兮龍目並曲河下而練湖深黃鵠旋西白兔馳東
杜鵑聞而鶴林仙去狼石臥而謀臣奠同崇丘昇兮五
州見邕港埭兮千艘通碧瓦鱗次朱樓翠重其陽則阡
陌之饒其陰則巖巒之叢包吳越而帶楚尾引淮泗而
疏汴中茲豈非京口之壯觀而為南郡之所崇哉余謂
客曰子旣已悉茲境之盛曾未厭於吾心蓋山川非人
不勝望郡惟前賢之登臨余旣與子觀江流而知海納
盍亦思往古而評來今昔也江表為鎮為牧轉運節度

刺史都督世代旋移幾千萬人之相躅晉則謝玄桓冲
唐則韓滉德裕旌旄擁於江皋貔貅夾於津渡辯士謀
臣歌姬舞女蝸觸蜂衙蠅攢蟻聚莫不樂其功賞夸榮
前度偉言論於青史騁英豪於茲土矣觀其踴躍功名
際遇風雲凌厲山川指麾民人恍千古如一日追陳迹
而無存慨江流之如昨情百感而難陳吾方與子攬江
山之勝槩瀕漁樵之洲島渺天地之一身若驚塵之棲
草嗟既往之難留思無窮之奚了於是挹林風而振長

袂坐盤石而飲清流知天命之已定與造物而同遊任
去來之自得復皇皇兮何求

壯觀賦

宋 米芾

米元章登北山之宇徘徊四顧慨然而歎曰壯哉江山
之觀也開闢竇古邈哉邈矣帝德所被北幽南趾王功
未宣六合阻異明翳視其消長來版從而間起去古無
章水濱莫委此世可悼晉裂漢毫披蓁剔莽且代且盜
豈地具而天設時資猶而附暴者乎乃物偶然而人乘

以智巧耳若夫真符秉中萬派朝宗稽顙納質不黷兵
鋒版圖入而地合氛祲照其天同速琛近賈千里不風
鑑湛一色折葦可通其或弱吹砌鱗疾焱湧山九地出
沒千峰上攢如嶺並亘連雲俱還長鯨齒巨天吳腹斑
閨運未至生民道艱宜乎曹郎託辭以按甲怫鬱而永
歎也吾每登是宇覽是土當日杲天清嵐開練布邀太
平君子引吳醇舞越女破千歲之長憂擲森然之萬古
有祀初登田儀載旅至甚醉而乃去

金山賦

明
鄭宗舜

金山我立彼江波其天造而地設抑神鑿而鬼磨煙
雲兮繚繞星辰兮布羅日月懸於楹牖蛟龍遊於檻阿
壯哉奇矣嘅夫長江萬里順流而東瀚瀚潏潏森森渭
渭吼狻猊馳風駿拔坤軸轉乾杠轟轟雷逐赫赫龍從
斷瞿塘之峽劈五老之峰固瞬息而千里若囊綻而矢
衝由之濤珠濺而柱折飛沫灑而磯崩順騰牛渚直指
吳淞滄瀛既迺合派愈衆斯正赴壑之勢窮寇之鋒將

避之而恐及敢獨立以當衝茲山則亭亭閒閒突自中
起立靜專壓波靡鄰援不資聲色不侈縱震撼之不驚
亦中立而不倚過長驅於破竹衝堅陣於兩臂斯不戰
而屈人兮亦匹夫而秉志猶之倒孟津之戈兮潰昆陽
之騎取日於虞淵兮存孤於晉紀櫻孤城於睢陽走老
瞞於赤壁誠文王之怒仁者之勇矣及循波羅之岸躡
至信之磯觀濶聽潮廊步不迷乘風帶月葛巾杖藜閣
則朝陽江天樓則海嶽涵虛眺煙雨之奇觀覽雙塔之

遺墟穿寂境折盤陀出藤蘿之外境登一覽之危披躡
蹠妙高之臺惕息冰雪之窩浮金湧翠嘉名不磨養素
鎮濤於焉再過大觀於海雲之亭重寄酬於郭璞胡日
中之不遁尤詭祕於江我既生死之有數將陵谷之謂
何考三禁之奇跡尋危巖之裴公出雪洲穿妙空橋度
惺惺池瞰蒼龍覩如來之面立般若之峰斯皆深瞰龍
宮高凌象度行者欬噓立者恐怖及登陟懸巖乃回頭
於一步細炊竹葉旋汲中泠將試蒙山之上品驗陸羽

之茶經動清風於兩腋覺沉疴之頓輕潤通法雨功邁
洗心撫轆轤則法輪常轉瞰深清則修綆宜尋斯第一
之稱萬世之名比厨異香積堂開大徹弘濟功深饑饒
道塞媿稷道之陵夷思博施而未得聿茲臺殿突兀龍
從或嵌懸壁或倚危峰或倒臨龍窟或上摩高空如翬
斯飛如苞之叢鱗鱗角角隱隱隆隆細細縕縕杳杳濛
濛竹牕搖日松榻流風丹霞護於懸磬鼉負其晨鐘
篆香凝而晝暝舍利見而宵明蛟龍驚輪藏撒綵雲流

旛幢揭貝葉動異香洩疑三島之瑤宮與大千之樂園
因而眺長江觀巨浪望海門瞻疊嶂時乎清風息浪月
上綠煙乍消金波不漾澄萬頃之玻璃連長天於一象
浮光湛然靜影晃晃恍若步金磚於琪園壓銀盤以青
嶂吳帆楚纜蘭橈竹榜欸乃輕歌伊啞緩槳來若中留
去疑不往或緩而似馳或迅而復蕩時乎風雨合蛟龍
爭陰霾起濁浪層馮夷舞海若騰長年泣舟人憐張皇
頃刻失措顛連使人神馳魄悸毛髮竦然若東海紅義

輪駕六合白瓊花下悉順時而改觀皆可喜而可駭觀
太平於有象開無聲之圖畫比夫暮鐘動晚潮升征騎
獵獵戰鼓鈺鈺嗟有期而不爽悟人事之虛盈若或指
戰場於北固望王氣於金陵蔥蔥萋萋渺渺冥冥覩蛟
盤而螭據思虎鬪而龍爭幸金湯之如故懷保障之無
能亦或仰長空飛鳥疾俯深淵遊鱗集臨磯呼老黿出
斯至信之所孚非一朝而一夕殆有甚聽法之蛟點頭
之石斯皆異態交從奇觀雜沓類有德之潤身而文章

之外飾者也弔維往古靈異彌臚啟水陸之玄宗拔九
幽之墮苦或胎幻以知期或書經而病脫雖在怪誕而
無徵又相傳而不惑斯又類神化之無方而非常情之
所能度用是名賢聞士固不假步回車或以為遊仙之
傳舍或指為文客之寰區用能解坡翁之玉帶發張子
之秀句斯有似夫德高而利見實修而盛譽者矣然是
豈直燕遊之地釋子棲息之居而已邪亂曰天高地厚
兮造化實工陽關陰闔兮變化無窮高高下下兮莫測

其蹤或山立於淵兮泉瀑於峰知無物不有兮可興可
風惟達人觀兮近取吾躬秉節貴定兮處世慎從修
德乃耀兮尚絅於中寧蒙求我兮匪我從童萬說不移
兮虛受而通始終一致兮德乃尊崇貧富不渝兮夷險
則同首陽奚貴兮千古高風我心匪石兮變化猶龍蒸
雲布雨兮靜乃有功將參三而中立兮焉事夫培塿之
蟻封言有盡而意無窮乃返權而擊節於江中

金山賦

盛恩

潤有金山公子與焦山處士相遇於大江之東公子嬉
嬉然有怡色詡詡然有夸容迺語諸處士曰潤自古昔
郡名朱方控引全吳凌躡大江金焦並峙東西相望膾
炙多口震蕩遐荒若有奚異與台並颺請各撰嫩用質
低昂夫金山者據京口之上游界南北之中央屹橫流
之砥柱亘帝都之巨防雄跨肇於太一嘉名錫於李唐
星紀牽牛熒熒煜煜而垂耀焉勢迎長江漚漚澎湃而
會交焉其東則吞吐溟渤枕倚扶桑玉山為肱爾質我

相雲山作股曲阜連岡石樞儼戶樞之闔關正屏羅物
色之弛張爾焦峰以列障彼北固以為隅含谿懷谷而
獻巧浣沙抱石而呈奇咸頽躬而下首可使氣而指頤
和風浩蕩拂其隈初月滉漾射其阿延暘谷之朝旭道
尾閭之夕波爾其宮室則基以重淵垣以積石苔以鱗
刺甃以雲覆高門有閑修廊旋復玄墀礪砥而流霞皓
砌琳珉而瑩玉大雄殿其中海雲堂其側焦光祠其右
善財閣其北吸江亭其巔水晶宮其麓寶蓮擢穎於海

峰朝陽蘸光於寶墨一漚浮於佳處壯觀得於望江飛
仙鍊丹而妙福千佛贊善於東菴於是乎秋蘭菅莎歲
蒨芷蔥薇蕨江離荔光載菁枸杞春華荼菊夏榮彌岡
被臯而蒨鬱蔓崖縈壁而敷英王芻尚臺戎葵懷羊青
菁射干揭車苞黃香藹藹而遐襲色芊芊而孔陽於是
乎蒼松翠柏杉檜梓桐樅枯椶楠赤檉丹楓大榆合抱
修疎雲叢挺幹垂條於谿谷繁陰布葉於岑峰鳳尾慈
孝篴簫射筒筍筍抽節綠葉翠莖傲霜競秀凌雪逾青

驚鷺食其實鷺鷥巢其中於是乎鵲鷓秋棲鵲鳴春鳴
雉鳩麗黃關關嚶嚶鵲鷓鴣駕鵲鴻羈理翮整翰於
其末浴波啄藻於其溟玄鶴白鷺黃鵠青晨於是乎瓊
桃蚤實琪草先華奇葩眩錦雜卉流霞葛覃莫莫而蔓
衍灌木萋萋而交加麗黃求友於蒼蔚之岑玄鳥掠雲
於瀉瀑之涯其西則遐矚岷峨邈挹荆楚匪以潯陽阻
以瓜步金陵道其脈五州袒其肩下鼻漱其液江流突
其巔龍潭峙而嶮巖直州行而平原江流湯湯直瀉萬

里怒濤雷奔驚湍電起大火墜於虞淵夕暉淪於濛汜
於是乎秋聲浙瀝白露載零井梧凋翠崖菊敷英鴈陣
驚寒於遠浦芙蓉倒景於滄溟木蘭侵桂校枿杞櫛爰
擢修幹載竦長條鵬鴉高騫乎雲漢猿猱長嘯乎林皋
其南則百粵所居四閩所通兩浙紆其臂三吳盪其胷
長揖會稽於逖域頰糾疊阜於邇封搏鵬星翥警鶴雲
翔菊峰挺秀峴嶺峩嶢寶蓋亭亭乎蔓蔕磨笄翼翼乎
清標漕渠習坎津驛通衢舳艫鱗次冠蓋塵驅客子肩

揮而競渡舟人楫詬以爭艤於是乎薰風薦爽水殿生涼嘉木繁陰鬱鬱蒼蒼虎兕風於冰雪之高蛟龍沃於迴瀾之房芰荷揚潁葵榴熾艷岸幘凜而增寒絺綌紛而忘燠其北則燕冀在望齊魯指掌徐泗孔邇淮揚接壤黃河紆帶而橫奔呂梁截嶺而流響挹具區之大藪鬱蓋蓋之無底爰自秦而徂通行鹽田之千里楊子之梁通其亢太一之峰委其體穹然秋虹之麗空邈爾蟻封之突起瓜渚作鎮天塹要津囂囂煜煜實我比鄰於

是乎朔風淒淒玄雲漠漠雨雪霏霏石出水落綺閣重
闌煖歌燠酌雪藕水桃互為酬酢鬱鬱盤徂來之松倚
猗撼崑崙之竹癯鶴啄寒瀨之冰梅花露先天之易娛
爾歲時瞻望北極爾其體勢則鳥道陟其巔龍宮守其
基滄浪流而為隍兩岸廓而為隅颶風無纖埃之集潦
雨眇微津之淤伏牛彷彿浮玉依稀獲符互父名與世
移爾其勝槩則金鼇中屹妙高插空善財頭陀怪石龍
從崆峒嶋竭石罅之山塘屹岵岵裴公之巖璞墳潰薄

而隱跡中冷涌清而寒泉爾其梵宇則大雄西敞輝煌
金碧天王伽藍前驅後翼江天乘曉潮之軒海嶽載毘
盧之宅雄跨玉鑑天徹悟心三禁永安養素涵清雪月
無邊煙雨化成留雲北偃吞海西憑廊腰紆折而蜿蜒
簷牙高啄而崢嶸若乃日霽天晴風和雲斂珠履尋芳
士女遊衍挈榼提壺登高望遠鏤壁鐫崖剝苔浣蘚估
客艤八方之舟三老忽龍門之險櫓聲伊軋於中流漁
唱悠揚於清淺揭寰宇之奇觀余耽樂而忘倦若乃陰

風號怒浪起蜃擁波龍撼雨閭若天昏蹴若地圯神蛟
鼓鬣而嗔怒江豚延頸而忤舞舟子狂呼傾檣毀櫓余
亦悄然而悲肅然而怖若乃貴介公子墨客騷人探竒
覽勝輝映古今感真宗之夢寐動文帝之哦吟英廟翼
申而晉錫武皇駐蹕而來臨宋學士之解帶唐宰相之
命輪金玉充棟珠貝盈垣歐蘇泝其流孫張啟其端煥
爾詞林爛然文苑托茲山而並久終萬古而弗諼若乃
明神降靈高僧棲跡裴陀能構佛印善葺菑畬薦千頃

之租水陸資萬方之福豈若野人之蹶躄宴子之齷齪
公子辭卑洩辭欠伸切齒怒目奮臂攘襟諒處士之見
屈敢怙勢而凌人

焦山賦

盛恩

焦山處士於是色若不敢怒口若不能言羞與之爭將
命履而還公子固止之前掣後曳強而後可乃相與班
荆蹠石從容而為之說曰道在反始士貴知方敬已者
絀軋人者亡被締繡者難與道疏布之麗密醉醇酎者

豈復知玄醴之芬芳囂囂煩穢潰德之坊瑰竒麗靡戕
性之良夏蟲之疑冰者篤於時也鷦鷯之自足者局於
分也吾子其未覩無方之大道焦山之巨麗乎且焦山
之肇基也資始於希夷流形於混沌蓋造化之所私實
靈鈞之所重真朱方之東域屹崔嵬於汪洋體坤維之
妙質萃水府之精英飲江海之靈液吸日月之休光不
銜竒以賈名不近譁而招累恒守約而不矜惟因循而
簡易任自然以為華無誘慕於世偽若度長而絜短豈

金山之可類辨方定位則或跨其左或伏其右而尊卑
定矣角形比體則或廓而豐或藐而確而小大形矣雜
物撰德則或動而華或靜而質而本末殊矣正名熙號
則或命之唐或錫之漢而後先別矣爾其體勢則東延
瀚海西道長江南抱徐陵北倚維揚體高鬱而幽夾紛
郁郁其難詳金山塞其外戶北固植之傍垣汝峯象阜
偃突連延京峴東霄疊嶂重巒絕巘增石簡積砢砭兀
嵒标翬傾旻倚伏或倒景於重溟或矗峰於空碧遐睨

蓬壺俯瞰沃焦洲渚肆衍漫漫漚漚摩窅巧老港洞卑
高坑谷坎窞窞安穿濇納夕景於桑榆晞晨光於陽阜
爾其山勢則盤紆隱深糾紛岑巖玄渚翠嶺岵岵崦
丹崖嶮巖青壁萬尋藐崑山之高嶽劣扶桑之鄧林重
巖增起連蹇雲覆隆崇極壯巍崛秀特上千霄漢亭亭
翼翼將躋巔而未半忽懼怵而駭惻非伏波之矍鑠孰
究升而竟陟消散氛埃澄集清澍雨師所駕風伯所憑
瞰宛虹之長鬣蒸靈液而出雲爾其江流則發源岷山

導流巴梁泓量海運滔洩淼茫湔湔瀄瀄稽天而白盤
渦谷轉凌濤山仄罔象暫曉而閃爍天吳乍見而髣髴
顛波奔突狂赴爭流觸崖觝隈鬱怒彪休滌汨澎湃蜃
壇相糾碧沙潰漑而來往巨石硨磲而却留呼吸萬里
瀆薄相陶協靈通氣吐納汐潮環四隅而為廓望孤嶼
而作標爾其勝槩則海門松寥兩山分峙禮斗燒丹兩
壇並據盤礴山顛嶺曰焦仙西南半麓三詔洞懸幽澗
積阻而礧確修岡峽磔而岬巘觀音羅漢瘞鶴釣魚各

以巖名獻怪呈奇石屏浮玉棧道礧礧觝角鑽丹諸石
錯置足音罕屆而岑寂間介無蹊而可躋惟霹靂之靈
塊倚義之之名迹偃青玉之曲塢俯碧濤之幽鷗朝發
河渚夕宿江湄浮沉往來乎四側雲集霧散乎高枝於
是乎猿父哀吟獬子長嘯梟羊麋狼青兕玄豹或失氣
而恐吼或挈攫而駭跳狄蹯之羣於菟之屬猓然之黨
羆猯之族騰蹕飛超於邃林沸亂翬散於僻谷於是乎
白鯨鰐魴青鯉翠輪銀鮐夏泳刀鯢春生江豚吼浪鷄

鵬避風汨汨沒沒沈沈溶溶鹿脰象鼻虎鬚龍鬣六眸
之龜三足之鼈揚鬐擁波掉尾噴雪曝米嚇鯢於其巖
汎漈混淪於其穴於是乎鉅生鴻儒文吏翰卿揚帆直
擣鼓柁來臨或嬉而遊或聚而吟或飲於阿或濯於濱
命楮揮翰鐫石紀文華壁高標乎秀句修篇錯落乎高
薨斷碑沉於芳瀨古篆蝕於苔紋於是乎遊世之士避
人之流榮啟之侶綺季之儔長棲邃穴靜偃竇幽貌綸
綍之三詔傲軒冕而悠悠僧人釋子蟬蛻鴻冥跨飛梁

而小構臨清渚而浮生說法而閨風發入定而巖穴暝
龍延耳而夜聽鶴輕馭而晨征於是乎淵客築室鮫人
構宮蘆子秉槎漁父汎船泝殿為洛羅釜灑筒投網逐
波迴輪趁風垂餌出入而連白鳴榔厲響而殲紅褫叔
鮪於驚湍曳玉鱣於巨漑貫鰓罵尾而嬉語掣三牽兩
而驩容於是乎萑葦被渚蓼蘋拂涯蘆筍菁蘗鬱鬱離
離潦水盡而是刈春旭晞而采之林無不縛岸無不津
耕新畬之沃壤播黍稷之萋萋負耒引犢荷插鋤雲飯

香杭而自足豈逐巧而求人若其幽遐闕邃閒曠硯突
耳目之所不逮足跡之所難入勝不可窮之於言妙不
可殫之於筆茲畧舉其梗槩以復吾子之見屈也

北固山賦

盛 恩

公子之與處士辯圓旣闢辭鋒廼厲各相誇詡倦而就
憩北固山主人於是揖而進曰二君之談樂乎蒙之竊
聽久矣嘗聞齊楚競利而漢得以信其威吳蜀爭長而
魏得以成其功敢申小子之末議以廁大人之高風公

子固云失矣處士其亦未為得乎夫太極肇判陰降陽
升游氣紛擾有萬不同凝而為山峙流而為川融長江
大河天限南北非以相感也喬嶽疊阜界畫邦圻非以
相欺也辨方正位者以中土為尊體國經野者以夷曠
為德今公子列為西藩而佻天以乘入處士命之東土
而露才以駁已皆不可以垂訓作則而適足以貽譏致
辟也金焦之事又焉足道獨不聞北固之名山乎吾將
語二子以主客之勢偏正之區江城之要會澤國之樞

機邃古之初上帝命都錫之潤土以界楚吳塹以長江
亘以喬嶽誰其尸之實維天作西峙金山東偃焦峰左
紆吾臂右引吾肱巍然北固雄跨在中水陸之所輻輳
四方之所具瞻陰陽之所委順風雨之所周旋日月之
所毓秀雲霧之所蒸液珍怪之所化產瑰奇之所窟宅
金精瑱其裏玉英琤其表驪蚌膠其趾梢雲冠其嶸據
坤靈之寶勢承蒼昊之殷純萃五德之變化含元氣之
烟煴玄醴涌騰於其麓甘露被宇而屢臻南臨鐵甕之

郭北倚揚子之江西控龍蟠虎踞之都東引海門天蕩
之鄉且其郡治直延轡宮傍翼神祠梵宇左起右伏關
梁隆跨廛市絡繹河隍委蛇闡堰交植城堞百雉而連
雲煙火萬井而在目者則星羅於其前也其沖澌沆瀣
渺瀰淡漫波如連山下合乍散波湊瀦濫浮天無畔濤
吼成雷湍颭為林崩雲屑雨詭色殊音舟人漁子徂險
極深汨沒於鼉鼉之窟挂罟於礁嶽之岑者則帶紆於
其後也其崇島巨壑崕岷孤峰俯劈洪波仰指太清柳

溪鰻井汨汨泠泠秋月之潭纖塵不凝鳳凰之池九苞
英英曲徑幽崖海嶽爭勝樓挹多景巖藏五聖走馬澗
泓海涵河映偃孫吳之狠石紀梁武之別名則古今勝
迹往往而在其朱闕穹隆梵宮高聳負陰抱陽前翼後
擁高閣齊雲百級懸磴諺門曲榭邪阻原洫修廊廣廡
頰連城堞彤雲斐亶以翼檣墩日炯晃而耀室則勝院
名菴不可殫述其稜稜劒氣款款鋒威弧矢聲轟驚塵
橫飛牝牡驪黃騰連風逸旌旗蔽野閃雲燦日鉦鼓發

而聞雷凱歌旋而震谷則演武之場關於其趾者也其
銅鑄鐵鑊蘚蝕苔侵容優百斛重踰千鈞浮圖鎔冶挂
日撐雲方竹之杖泥蠟之金古鐵擊之而清越斷碑疊
之而嶮崙則瑰奇名物藏於其中者也其靈草冬秀神
木叢榮巖峻嶢岬金石崢嶸珊瑚碧樹周阿而生布萋
萋之纖卉挺落落之長松蔓樛木之修蘿延葛藟之飛
莖朱桂黝儵於南北紫芝阿那於西東梗楠蔥芷鬱鬱
蓊蓊則林麓之饒於何不有其長楊映沼芳枳編籬植

以柅柳坊以金隄梅杏郁棣蔥韭薑芋朱櫻碧蓼勤薺
萊蕪諸葛之萊張公之梨周文之棗房陵之李磊落繁
英於其林負霜含露於其畦則園圃之毓實繁有叢具
援雉晝吟鼯鼠夜叫寒熊振頷特麇昏髡山禽晨鳴野
雉朝雊虎豹豺兕鵬鸚鷹鷄飛揚躍竄而邁馳翩翻馭
駭而駭跳則毛羽之羣草伏而木棲也其魴鯉鮒鰕海
若鯨魚玄牛紫貝水豹耆龜叔鮪王鱣江豚海狶交躍
縱橫振鱗奮翼洩洩淫淫駭神奪目中流瀆薄而閃屍

滄瀨蹉跎而失足則鱗介之族晨游而夕泳也其皇輿
帝蹕霸主道君卿相之輻刺史之輪翰苑詞林之玉趾
幽人空谷之足音旅子瑣尾而落魄估客失歧而問津
則延頸繼踵其從如雲其宸翰綸音雄文妙墨雜煥斗
星錯置金玉或榜之楣或鏤之石秀章熠燿於碧丹鳥
篆虬蟠於朱綠則雨蝕塵蒙不可盡識若乃冬不淒寒
夏無暉炎均調中適四序便便法鼓琅以振響晨香馥
以揚煙琴高之所靈矯王喬之所留連釋子盤石而誦

法方士餐術以延年丈人抱甕而灌畦農父負壠以耕
田蒙草塞谿人跡罕至風月無邊丹青失技望之者過
臨至止者忘去言有大而非誇事足徵而可據豈若孟
浪之遊談無當之虛譽也主人之言未卒金焦二客乃
矍然相顧睨焉失色再拜致恭同聲而謝曰聞韶獲者
然後知鄭衛之淫汙覩無窮者然後悟井天之咫尺僕
黨疎狂進退維谷而今而後庶幾有識主人亦莞爾而
笑油然以懌乃相與啜中冷之茗酌甘露之醴飯新畬

之禾烹長江之鯉歡然相得擊壤而各為之歌公子歌
曰望帝都兮歲徙屹中流兮巍巍駕金鼇兮駸駸鎮朱
方兮無隕處士歌曰吸滄溟兮湯湯聳具瞻兮東方樓
高士兮焦光名萬古兮洋洋主人歌曰江浩浩兮山峩
峩鞏朔域兮潤之阿振鴻濛兮撼鯨波

洞庭兩山賦

有序

明
王 鏊

楚之湖曰洞庭吳之山亦曰洞庭其以相埒邪將地脈
有相通者邪郭景純曰包山洞庭巴陵地道潛通傍達

是未可知也而吾洞庭實兼湖山之勝始山特為幽人
韻士之所棲靈仙佛子之所宅至國朝名臣徹爵往往
出焉蓋湖山之秀磅礴鬱積至是而後泄於人邠東岡
子曰山川之秀實生人才人才之出益顯山川顯之維
何益莫過於文兩山者秘於古而顯於今其實有待子
無用辭余曰然乃為之賦其辭曰

吳越之墟有巨浸焉三萬六千頃浩浩湯湯如蒼溟渤
澥之茫洋中有山焉七十有二渺渺忽忽如蓬壺方丈

之髣髴日月之所升沉魚龍之所變化百川攸歸三州
為界所謂吞雲夢八九於胸中曾不蒂芥者也客曰試
為我賦之夫太始沕穆一氣推遷融而為湖結而為山
爰有羣峰散見疊出於波濤之間或現或隱或浮或沉
或吐或吞或如人立或如鳥騫或如鼇鼉之曝或如虎
豹之蹲忽起二峰東西雄據有若巨君彈壓臣庶又若
大軍之出千乘萬騎旌幢葆蓋繚繞奔赴東山起自莫
釐或騰或倚若飛雲旋颺不知幾千百折至長圻蜿蜒

而西逝西山起自縹緲或起或伏若驚鴻翥鳳不知幾
千萬落至渡渚迴翔而北折試嘗與子登高騁望近則
重岡複嶺喊呀摩谿紫洲枉渚蜃壇緬邈遠則煙蕪渺
瀰天水一碧帆影見而忽無飛鳥出而復沒靈巖則返
照孤稜弁山則輕煙一抹此亦天下之至奇也若乃長
風駕浪歎山欲野足使人魂驚而汗駭及其風日晴熙
穀紋連漪又使人心曠而神怡至於瑤海上月流光萬
頃星河倒懸蕩漾山影又一奇也遙山霽雪凝華萬疊

玉鑑冰壺上下相合又一奇也風雨晦明頃刻異侯煙
雲變滅咫尺殊狀雖有至巧莫能為像試嘗與子弔古
尋幽則有迴巖峯壑竊窳相通琳宮梵宇暮鼓晨鐘壽
藤靈藥美箭長松金庭玉柱石函寶書靈威丈人之所
闕也貝闕珠宮繡轂鳴璫柳毅書生之所婉也翠峰杜
圻范蠡之所止息黃村角里綺皓之所從逝也而闔閭
夫差之跡尤多存者玩月之渚消夏之灣牧馬之城圉
虎之山練兵之瀆射鶚之巒出金鐸於淺瀨逸梅梁於

驚湍他若毛公燒丹之井蔡經鍊藥之塢聖姑絕雉之
塘雪竇降龍之淵其石則岌業嶙峋瘦漏嵌空牛奇章
有甲乙之品宋良嶽有永固之封其泉則困淪熾沸甘
寒澄碧墨佐君表無礙之名天衣禪留悟道之跡斯地
也孫尚書欲卜居而未能范文穆思再至而不果豈如
吾人生長斯土依巖架棟占野分圃散為村墟湊為闌
閭桑麻交蔭雞犬鳴吠里無郭解劇孟之俠市無桑間
濮上之音婚姻相通若朱陳之族理亂不識若武陵之

源佛狸之馬跡不到周顒之俗駕自旋星應五車地絕
三斑盧橘夏熟楊梅日殷園收銀杏家種黃柑梅多庾
嶺梨美張谷雨前芽茗蟄餘萌竹水族則時裏之白鱠
殘之銀魴鱸鮓鮓自昔所珍吾且與子摘山之毳掇野
之茸割湖之鮮釀湖之釀汎白少傅月夜管絃之舟和
天隨子太古滄浪之歌弔吳王之離宮扣隔凡之靈窩
凌三萬頃之瓊瑤覽七十二之嵯峨其亦足樂乎彼岳
陽彭蠡非不廣且大也而乏魏莪之氣天台武夷非不

高且麗也而無浩渺之容蓋物不兩大美有獨鍾茲謂
人間之福地物外之靈峰是固極遊觀之美而未知造
化之工且夫天地之間東南為下非是湖為之尾閭洩
之瀦之則汎濫橫溢江左之民其為魚乎懷襄之世湖
波震盪非是山為之砥柱鎮之繞之則奔激暴鑿湖東
之地其為沼乎唯夫天作之寬以納以容地設之險以
襟以帶禹順其流分疏別派三江既入萬類永賴而後
吾人乃得優游於此蓋至是而後知造化之意深神禹

之功大許曰吾何歸乎吾將歸乎湖上之青山世與我
而相遺超獨邁其逾遠海山兜率不可以驟到非茲峰
之洵美兮吾誰與寄此高蹇

槃谷賦

明王鏊

夫何太湖之淼茫兮峙雙玉於西東蔚澱紫之巉巖兮
峰巒抱而中空渡渚汪洋而交貫兮仍島嶼之無窮稻
畦鱗次以櫛比兮美西崦之寬宏亭臺儼其高下兮閭
巷互而相通嗟夫人之好修兮乃行義於其中握瑾瑜

而不耀兮甘自混於凡庸朝出耕而暮讀兮澹浮名之
夕空非夫人之獨善兮慨斯世之不庸不吾庸其亦已
兮信橫目之為恫仰觀山之峩峩兮俯翫水之溶溶俯
仰山水中以自得兮將有言兮是從將無言兮是從

虎丘山賦

有序

明
梁寅

孫茂才其淵歸自吳郡詫虎丘之勝代雖屢易而境乃
不殊因求賦之余昔嘗東遊登眺靡及歎遐想之徒勤
媿賞音之猶缺處幽慕竒遂為之賦於其淵之再往也

書以遺焉具辭曰

雄矣哉逶迤蜿蜒句吳之都東臨乎滄溟赤城西瞻乎
富春桐廬虎丘之山眈眈渠渠千層雲之晻霭瞰澄流
之縈紆伊昔壽夢四傳英君奮烈威摧強楚勇讐於越
宮車旣晏宗陵截薛於是閼寔洞深珍玩厚藏精金之
氣夜發奇光化為號獸彪炳呀張茲虎丘之所以得名
增氣勢乎高岡故陟而望之危闌罩起飛觀鵬騫魚鱗
萬室蜃彩百屋人行肩摩商萃社連騎若電燿車若雷

闌踰齊軼秦跨趙陵燕俯茲山之下則煌煌金地峩峩
梵宇度清飈於松關騰香靄於蘭路龍游方石之池鶴
鳴珠英之樹猿蹲聽經之巖鹿翔散花之天亦有搜奇
雅士探幽逸人逍遙寒澗跼蹐夕曛詠頽霞於初霽侯
素月於將昏乃步石逕乃睨層臺寂寂歌舞萋萋蒿萊
日淪而復東生波逝而無西迴古轍迹久夷荒墳日已
頽義聞恒不泯雄心乃終摧嗟孤忠之伍員凜生氣而
猶存馳逸興而易已信遺蹤之未湮

虎丘看月賦


明 黃尊素

武林有客吳者適逢八月之望吳公子邀之操單舸遊
虎丘蓋吳俗翫月大抵集此也至則綺羅竿交笙歌鼎
沸月懸扶桑煙浮水際巨舩小艇縱橫若鷗鳬之集於
是攜餽飮尊竿靡薜荔以為席有少年持檀板坐生公
石起子夜之吳歌振激楚之餘風出潛魚於水底落山
鳥於青松善洞簫者倚歌而和之吹幼眇激壯音嫋嫋
餘響聞者沾襟興盡而返水蒞公子曰今日之遊樂乎

客曰是何足樂也公子曰子豈以蘇臺空西施去夜月
隨煙浪以滔滔故墟餘蘼蕪以離離哉客亦覩夫勝趣
乎蓋聞覽勝者不逞巨麗以為觀也得趣者不搜奇地
以為歡也其山不必龍嵒崔巍巔巖紆鬱絕歸鴈於碣
石接飛鳥於暘谷其水不必洶湧滂潏控清引濁天吳
命儔而嘯侶鯉魚踞齒而四足其林不必棄夸父之策
伏夔魑之怪擢本千尋垂條四蓋猿父哀吟其中治鳥
焚巢其界客試略海島之巨觀現吾丘之餘態勃窣叢

薄之中逍遙雲岫之槩過林莽背嶽敞平疇衍漾孤峰
逶迤周圍一里之內而名泉怪石古寺殘碑充牣其間
雖窮搜而尚遺况復伯國之餘烈名姬之斷魂晉人之
風流皆足以醒弔古之心脾試與子浮彩鷁挂錦帆振
衣盤虎之巔濯足劒池之瀾指點夫差之自用再見士
誠之偷安而層臺累榭跨谷彌山錦瑟歌鐘漏徹更殘
都已付之斷腸芙蓉啼眼幽蘭事無新而不故人無感
而不靈聰經聲於木杪掘藥草於寒汀山山明月處處

秋聲撫鶴歎息捫松傷情吾將邀孫登以長嘯命王子
而吹笙斯時極人世之繁華五嶽之奇險未嘗與虎丘
有逕庭也客顧以蟻垤蜂衙視之減虎丘之勝趣何睥
睨吾姑蘇之甚乎



御定歷代賦彙卷二十一

欽定四庫全書

集部

御定歷代賦彙卷二十二

詳校官檢討臣劉 忻

主事銜臣徐以坤覆勘

總校官編修臣王燕緒

校對官中書臣嵇承志

謄錄監生臣張元功

欽定四庫全書

御定歷代賦彙卷二十二

地理

遊天台山賦

有序

晉
孫綽

天台山者蓋山嶽之神秀也涉海則有方丈蓬萊登陸則有四明天台皆玄聖之所遊化靈仙之所窟宅也夫其峻極之狀嘉祥之美窮山海之瓌富盡人神之壯麗矣所以不列於五嶽闕載於常典者豈不以所立冥奧

其路幽迴或倒影於重溟或匿峰於千嶺始經魑魅之
塗卒踐無人之境舉世罕能登陟王者莫由禋祀故事
絕於常編名標於奇紀然圖像之興豈虛也哉非夫遺
世翫道絕粒茹芝者烏能輕舉而宅之非夫遠寄冥搜
篤信通神者何肯遙想而存之余所以馳神運思晝詠
宵興俛仰之間若已再升者也方解纓絡永託茲嶺不
任吟想之至聊奮藻以散懷

太虛遼廓而無閼運自然之妙有融而為川瀆結而為

山阜嗟台嶽之所奇挺實神明之所扶持蔭牛宿以曜
峰託靈越以正基結根彌於華岱直指高於九疑應配
天於唐典齊峻極於周詩邈彼絕域幽邃窈窕近智者
以守見而不之之者以路絕而莫曉哂夏蟲之疑冰整
輕翮而思矯理無隱而不彰啓二奇以示兆赤城霞起
以建標瀑布飛流以界道覩靈驗而遂徂忽乎吾之將
行仍羽人於丹丘尋不死之福庭苟台嶺之可攀亦何
羨於層城釋域中之常戀暢超然之高情被毛褐之森

森振金策之鈴鈴披荒榛之蒙龍陟峭嶠之崢嶸濟
溪而直進落五界而迅征跨穹窿之懸磴臨萬丈之絕
冥踐莓苔之滑石搏壁立之翠屏攬樛木之長蘿援葛
藟之飛莖雖一冒於垂堂乃永存乎長生必契誠於幽
昧履重險而逾平既克濟於九折路威夷而修通恣心
目之寥朗任緩步之從容藉萋萋之纖草蔭落落之長
松覲翔鸞之裔裔聽鳴鳳之嗃嗃過靈溪而一濯疏煩
想於心胷蕩遺塵於旋流發五蓋之遊蒙追羲農之絕

軌躡二老之玄蹤
陟降信宿迄於仙
都雙闕雲竦以夾
路瓊臺中天而懸
居朱閣玲瓏於林
間玉堂陰映於高
隅彤雲斐亶以翼
檣皦日炯晃於綺
疏八桂森挺以凌
霜五芝含秀而晨
敷惠風佇芳於陽
林醴泉涌溜於陰
渠建木滅景於千
尋琪樹璀璨而垂
珠王喬控鶴以冲
天應真飛錫以躡
虛騁神變之揮霍
忽出有而入無於
是遊覽既周體靜
心閒害馬已去世
事都捐投刃皆虛
目牛無全凝思幽
巖朗詠長川爾乃
羲和亭午遊氣高

褰法鼓琅以振響衆香馥以揚煙肆覲天宗爰集通仙
挹以玄玉之膏漱以華池之泉散以象外之說暢以無
生之篇悟遣有之不盡覺涉無之有間泯色空以合跡
忽即有而得玄釋二名之同出消一無於三幡恣語樂
以終日等寂默於不言渾萬象以冥觀兀同體於自然

桐柏觀賦

有序

元袁桷

孫興公天台賦運意高簡忘象以求斯得之凝和盧君
居是山以桐柏觀圖授余曰子為我演繹其景不揆瓦

石援筆為之賦曰

厚坤載德台山效靈蜿蜒扶輿天孫之精仙書易之以
桐柏敞神界為金庭轆轤三光磅礴太空睇暘谷之倒
景卒莫能擬諸形容也睠彼華頂羣山啓蹤倡九牧以
執玉巍冠仰其顥顥香林玉霄夾驂以從華林不彫卧
龍嵒龍玉泉御右法蓮殿戎東峙翠微西蹲紫霄巧面
勢以規輔玄扃沉沉乎沈寥維妙有之珍館匪攀援之
可求除三彭之內蕩守中戒以默修影息於鄧林機忘

乎海鷗上池飲之以洞視金膏服之而冥搜不然者良
不能以久留也粵昔子晉韜精帝京弄參差於緱山搏
扶搖以遐臨瓊臺儼其龜負雙闕屹乎龍蹲正右弼以
贊化千齡髣乎氤氲故茲山也四面削成中心如掌真
風合乎冥廓梵炁通乎肸鬻三井之泉千尺之潭皋羽
警其瀼露鬚羊匿於陰嵐飛梁凝冰側足涉褰翠藤流
霜觸纓捫緣梭溪交流以織文忽蟠螭之鈎連望飛瀑
之懸絕日五色而成妍夫樂與餌過客所止夸誕逐魂

踐形者恥長生之藥渺茫於神山執期之候詎諒於五
利却衰疏頑簡易理得其亦有所益乎菌蠢春秀質簪
冬萌五粒之松三脊之茅丹光騰於金鼎冰泉徹於銅
罍服食之而不墜身輕忽焉以復丁企列仙之遺蹤葛
翁策名於太極斗宿晶瑩於樞紐金光雜流於瑤席納
雷谷之砰礚窮幽淵之罔象丹鳳昔焉以來儀凡羽厥
今以避讓諒守貞以制氣匪狡獪以增誑法不孤立道
不虛行繼之者白雲先生受素書於軒轅襲帝胄以典

午檐寡言而無營思坐忘以遐舉承唐皇之明問敷清
淨之舊章署漆書於寶幢迎黃雲於玉堂厥後憲章希
夷範圍靈寶誦蕊珠之玄文過期頤以終考若是者誠
何異於蓬島或有言曰樓臺榮觀方士侈崇夷考是山
不綺而豐不幽而通廓兮其有容閔兮其訖逢味興公
之快奇訊擇木之寫真若增其嶽峯盡其窈深身不羽
而凌邈俄曾城以瑤林乃若丹霞伏光鐵柯舒英集衆
妙以凝睇髣三真之傳經擬金剛以鐵磨警黑業於洪

鐘何錢李之二王莫能悟其祿終猿抱子以望月虎伏
威而調風靈璫清以集鸞哀絃急而驚鴻爰自有而即
無眇一氣之鴻濛悼南國之蒸歆髣天都之肅烈彼夏
蟲與火鼠徒自煎以內熱申之以辭曰帝子下兮雲中
質通明兮粹中覽炎洲兮垢紛節容與兮茲峰蓬瀛杳
兮無極浪滔天兮不可以履境荒滅兮妄益曰此留兮
吾將以內息神為尻兮氣為輿朝紫霞兮暮清都斥視
聽兮道靡渝厯千劫兮復故初雲凝素兮中壇鈴流露

今日瞰三災屏兮嘉祉繁語夫世人兮歸休乎靜觀

鴈蕩山賦

有序

宋薛士隆

走家東甌有祠祭田在鴈蕩山下行年三十而未之到
隆興初赴調因取途焉愛其巖谷秀異無虞無錄莫之
能名念其山水奇甲天下而未有文賦欲賦之未可也
歸得建炎間郡丞謝君升俊山圖石本字多漫滅已而
得樂清洪丞戴所鑱新圖并賦歲正月望始得皇祐校
書郎章君望之山記又假舊圖於葉氏以補圖缺於是

圖籍大備顧皆敘次疏闊洪賦工矣而猶有未盡故為
集略成賦得而覆瓿誠何望於左思擲地有聲信多慙
於孫綽聊依準實寄意山泉云爾

溟渤轉乎東南鴈蕩鬼其高峙抱層巒之四合聳羣峰
之崛起仙凡道絕類隔一塵摩空下望儼若屯雲聊登
臨以寄傲循石磴之縈紆移顧步於觀瞻暫風氣之懸
殊幽谷之中別有天地玉筍排空而剡翠瓊館憑虛而
綺麗微埃不入其方寸纖土不留其度內峰夏雲之競

秀均倚劒於崆峒崢嶸萬仞之嵯峨羅巧妙之巖從粵若
遂初天愛其道靈山秘秀孰知其寶傳西域之仙書肇
棲神於羅漢睠人寰之緬邈極希夷之汗漫偏為幽獨
蓋始得於唐僧之詠看之不足此樵翁為之浩歎者也
我國家太平興國之二祀天下車書始同有禪師曰全
了菴廬初結於芙蓉行亮文吉踵於前甄昂作尉從而
後靈巖碧霄嶺屹而並露南閣白巖孱顏之盡剖起初
凡七十有三年而後隴斷之不遺蓋成終於皇祐之已

丑稱始開於祥符之伐木者故適當其會謂遷就於貫
休之詩者見不臻乎首是知水鑿之為曉論其又何知
造化功成之不有乃其東望秀嶺道屬天台山川襟帶
於四明風雲呼噏於會稽無非仙人三乘窟之宅誰能
見其一日而數相往來其西則蓋竹雲門白巖白鶴魔
軍退舍而真宅斯建至人入竹而誠明可作洞天高遠
以誰訊福地潛通而巨度陰有楠溪其陽際海幹地軸
之盤踞望天涯之斯在崖有千里之石壑有萬年之松

金雀么而不大金猿綫而多茸樂官羣處而和聲山羊
厯險而純素若夫王孫麋鹿鷹鷄烏鵲衆獸常禽之類
他山既多有之茲故不詳其名數山之狀也崇倚青天
峻連霄碧凌霞傑出於疎雲疊嶂牽聯於紫極工如大
巧特若小高三巨相形而崱嶸獨秀孤立而敦嶠瑞星
明而治世皆見霹靂轟而聵者不聞常雲舒而莫卷白
雨霽而猶零牛女從橋而星河可度雷張望氣而龍泉
可得璧月懸空而夜夜長滿朝陽薄暮而光明烜赫貫

香珠之落落起祥雲之疊疊玉峰高並於兩巖利孔開
通於雙穴積翠合於拾羽之衆紫微居而衆星拱列觀
架海之騰波浩浩望平霞之火炎烈烈苞有菡萏菌有
靈芝立筍圓而削玉丹桂茂而藥枝蓮花芬拆而木末
可采圓蘿糾結而鱗比相差其於人也總者如角直者
如指圓者如臍礪者如齒佛掌高而頂可摩神迹巨而
武可履詣方丈而問維摩之居士行妙高而見香嚴之
童子龕巧合於佛影樹有同於僧寶五通變化之有靈

三清逍遙而適道天王朝祭而明堂斯在西真翔集而
瓊臺莫訪對人道術之相忘招賢仁義之為尚尋朝賢
之舊隱得侍郎之菴居觀音行而隨形示現羅漢遊而
飛錫騰虛三傑際風雲之會七賢從竹林之下五老來
兮書籍校千聖會兮德星聚朝天義重於尊君抱兒愛
均於慈母爾乃展旗障日立戟排雲關弓飲羽長劒倚
天射堦遠而破的馬鞍跨而絕塵文筆擅場於文會戴
仁踐履於安仁寶印得之而如斗金鼎負之而調羹啓

橐籥而布化鳴鐘鼓而振聲碑磨崖而沒字鏡無心而
鑑形乃有琢雙玉獻連珠咀文英讀靈書對棊枰舉覆
孟振藥杵火茶爐盍簪加導於仙冠折角尚賢於巾子
藏珠媚而淵水不涸爐藥就而羽人不死行道周遭於
石佛栖貞高蹈於迎雲空洞虛而無物雲霧合而神興
郭有石城度有石梁入有天門窺有天牕有堂有室有
斛有倉旌有石表蓋有板藏門樓高屹以超雲霓闕對
峙以迎陽澡身莫便於浴室修道何樂於禪林考室而

柱金龜立蔽風而翠屏是陳版障駢而可隱行廊修而
可循像有師子鹿影靈龜鯽魚三燕頤頤而穿幕戲龍
驤攫而含珠飛羣鳳之徘徊戲雙獅之矍鑠猴不可以
加冠魚有時而登陸羚羊挂角以棲止回鸞騫翥以翱
翔犬以警而司門貓以游而在堂龍倦遊而或卧虎已
蹲而更伏御火共施於鷗尾照水熟然於犀角天柱之
峰上凌空碧其旁無附其趾無蹠削貞珉而介出崇高
切於青雲圓度於規直中於緡望之者目極倚之者驚

神疑共工氏之不作不周末觸而今存此峰巒之客立
者餘蓋不得而縷陳彼有同名而不相似者於彼吾又
何言其水則二龍之湫東瀑西瀑合掌摩訶劍鋒乳酪
水簾眩日以舒耀新月弓彎而出谷清涼之滴滴無已
照膽之澄泓可矚彼潭之泳者湖鰻或澗而流之斤竹
決而下也銀河瀉而垂練委而去也錦文鮮而漬淥觸
潛蚪而聲韻鸞和漱堆埼而皴如皴玉委蛇而動行乎
巖石之間者何容窮盡又豈祇清溪之幾曲也泉流之

冠大者龍湫崖犇如仆氣凜如秋界青山而澎湃吸蕩
水之宗流上擬青空下臨無地霏微雨霧之飄散晃朗
白虹之下墜乍垂雲而零露恍山崩而川至雖淮流破
荆山之堰曾不足以言其髣髴衆水之淵發源鴈蕩厲
巍巒之峻極浸山椒之修廣箴竹叢生以蒙翳娑羅挺
榦以駢羅征鴻攸聚牡礪生之浮鐵船之蕩漾沉古鐘
之逸響派旁泄之崩波羌不以五水九旱而為之消長
傳或謂滄海此遺波焉今固莫詳於既往矣乃若浮圖

天成古塔神造香爐既設寶幢載好楞嚴翻大乘之典
寶陀襲白衣之號高僧梵唄之相和仁祠金碧之相耀
惟茲華頂花壇是陟居者有積行者有食無芸仙者之
田每駐遊人之屐然雖曠世而彌年猶未覩周遊而涉
歷者也爾乃樂成首路東驚幽尋絕白沙之古塞陟峭
嶺之芳林秣馬於芙蓉之驛驅車於長徽之原招提寶
塔屏障橫焉千巖萬壑是途伊始扶筇竹以自杖屐登
山而後齒於是奇巒卓犖怪岫崢嶸傍顧而塵慮都息

相羊而油然意生登寶冠之蘭若跨飛瀑之修梁引仙
簪而栽首裊熏爐之裊香前眺諸峰萃焉亭直揖雙人
而問道屆凌雲而一息九龍垂頭而來下梅霖飄灑以
霏零洗余心之宿累拂襟袖之泠泠望銜珠而返顧跨
伏虎於石門里連霄之十五窺蕩水之靈源凝神寓目
千里為近羣玉浮天全乎一瞬度東岡之桐嶺禮化士
於雙巒指遊龍與戲舞鏡三京而膽寒大屏之下寺曰
能仁四溪交流並輳天門舞羣鳳之垂天儼華陽之挺

立吞衆壑以朝宗拱萬山之環揖是雖奇峭無多焉固
已冠峰巒之磔岌也羊腸回於六八俯在下之蕞山羌
有鳥而有花悟達士之微言回巒之嶂隱若金城漢唐
道隔言訥天升惟隱顯之有時殆匪由於人力何先古
之神閔須後來之挾別載旋余步溪澣攸行小柱華嚴
接阜連岡躡曾巖之鹿苑窮逶邐之淵泉屏彩翠之蒼
蔥聽天樂之喧闐仰大龍之懸水飛小雨之濛濛樂尊
者之優游得從容於下風指普明而回御探龍窟於飛

泉勒鞍馬而東之望奇峰之隱天觀音大士如住虛空
漠漠行雲誰尋舊蹤安禪之谷萬夢宗焉大筆書空一
柱擎天重樓俊傑以連甍雙闕當塗以相向天牕玲瓏
其四達自在慈悲而有像龍蜿蜒而歸洞離小湫而擁
曳發在定之熏聞鼻凹窪而出涕奮天然之鱗鬣回玄
造之頭顱諒茲山之多怪猶斯巖之匪如其闕伏龜重
樓雙峰其巖橐籥金柱石書摩虎口以東逝瞻石城而
近止訪淨名於丈室挹乳泉而一洗乃觀初月乃下虛

簾鉸人織素近在危簷閱靈峰之景物奇特亞於靈巖
犀黑閣而通天龍神遊而處潭五雲閣道應真矯矯谷
有靈珠歛生芝草入會賢之磴洞仰虛室之豁舒信真
如之可學烹乳茗而生葩金掌高呈亭亭空際訪三賢
而景行遂回車於真濟過胡公之棲宅遵靈運之迷途
造石室於東梁高禮佛之勤渠亭白若而下道窮二閣
於蕩陰忘散漫之岡巒蓀無隱於追尋北有白巖石谿
九折山橋跨焉巉巖影絕斯蓋水之奇也履芝田而種

玉煉爐火以飛霞羗仙人之不反厭時俗之囂譁過湖
坑於南閣栽土藏之孤高壯瀑水之滂流訪仙隱而遊
遨至窮途而輒哭等遊夢於華胥問山僧以前路固有
匪吾人之所如者殆不可以窮竟又安得而論諸至若
大洞神山仙靈是宅龍湫宴坐者諾矩羅之住世虎蹲
守護者蔓定僧之衣衾也至人遐造踐迹無同運無方
之玄化闡不二之宗風說法詎離於在定經行何間於
神通聞縮地於偷桃之客神飛於窺鏡之童龍丹成於

老父九二識於元豐神屠履崖以如地聞思光燄以如
虹盜石而江波激怒觸鼻而涓泉不通者非人耳目之
所到而又烏得以議其洿隆也惟茲山之神秀嗟近在
於人間曾跬步之不到乃窮人而上天化石橋於北閣
企斤竹之飛泉抑子晉未成於羽化而謝客不得擅於
遊山也今夫天下之山江東居最永嘉富甲於江外而
鴈山為大焉可為超羣而拔萃矣他山之秀么麼稱妍
陽臺十二秋浦九蓮詩文振古名字喧天僅得此山之

一丘一壑猶拳石之夫何足言所謂夷泰山而吞雲夢者惟鴈山之蕩為然

吳山賦

元汪克寬

天沈寥而清曠兮金風淅淅而蕭森駕言馳驚於西浙兮縹余馬於虎林寓遐矚於此邦兮爰陟吳山之高岑苔梯石磴縈九折之委蛇兮躡巉巖而登臨躋崔嵬之峻頂兮眺奇嶽之嶽峯倚太虛而峭拔兮嶮崿崩削不知其幾層根盤數千里而廣袤兮周迴紆鬱於坤垠層

崖倚披而鵬翅兮疊峰峻嶒而蚪鱗煙雲歆薄其萬狀
兮日月蔽虧於夕晨草木暢茂而異香芬郁兮靈竒恍
愴而升沉東望則海門之峩嶺兮三島負鼇而鼎負天
目渺以西至兮萬石飛來而錯峙左西湖之瀟灑兮匯
冰壺而清泚浙江右帶而混瀚兮驚湍澎湃而澎湃紛
總總其上下兮舳艫舳舳相屬於千里下窺闐闐之行
迤兮樓觀巍我而疊起衢道衡縱而如畫兮車馬駢闐
於九軌異珍輻輳以咸萃兮委南金而象齒大府屹立

於雄藩兮覺棟輦飛而麗美台星耿耿而旁燭兮閣婆
琉球會同而至止挹佳氣而拄笏兮偉翠屏之若倚緊
是山之鍾秀兮肇玄黃之開闢顧名號之曷從始兮繇
泰伯文身而建國闔閭揮戈而駕楚兮夫差奮矛而栖
越何西施之嬋媛吾以為好兮賜屬鏤於婞直勾踐長
驅而沼吳兮胥汎遺忠於潮汐銀屏雪屋衝突於山趾
兮存英雄之遺跡叢祠屹於崇岡兮薦馨香於明德高
風稜稜而與此終古兮鎮坤輿以無極歌曰大塊流形

峙危阜兮句吳祚土錫分守兮伍員鯁直忠肝剖兮命
祀千載怒潮吼兮聖人馭極一宇宙兮拳石海堧如培
塿兮雄藩重鎮永遐久兮蠻夷卉服拜稽首兮我皇撫
運億萬壽兮抽思作頌貽不朽兮

禹穴賦

有序

元楊維禎

會稽山為南鎮見周職方至於今祀典不廢人以不見
禹貢為疑禹貢書治水起止自揚州止於震澤故會稽
與浙河皆不登載禹穴在會稽山見皇覽又見太史書

人以葬衣冠為疑考帝少康封庶子於會稽以奉守禹之祀則禹穴在會稽無疑也真誥以禹醉鍾山而仙去此異說之謬也又以穴藏禹治水祕策者尤謬故辨其說以為賦

追太史之東遊兮躡夏后之巡蹤過會稽之鉅鎮兮登宛委之神峰曰羣聖之所栖兮闢陽明之洞府問東巡之故陵兮固已失其寔所繞古屋之雲氣兮瞻袞冕之穹窿雷霆掣夫鐵鎖兮梅之梁兮已龍湫空山其無人

今挂長松之落日枕荒草之芊眠兮栖專車之朽骨忽
白日其有爛兮射五色之神晶窺神迹於一竇兮眩太
陰之窈冥世以為衣冠之壙兮神書之竇也圭璧出乎
耕土兮彼巨石者不可扣也曰玉匱之發書兮遽淵淪
而天飛賴餘策以汨鴻兮復韞櫝以閱之夫以四載之
跋履兮亦云行其無事錫玄圭以告成兮始龜文之來
瑞何誕者之夸毗兮異九疇而不經使穴書之不泄兮
夫豈汨陳其五行觀連天之巨石兮妙斧鑿之無痕南

筭削乎其玉立兮東娥接其雷奔塗峰歸其西北兮執
玉帛者萬億夫既遊而遂息兮吾又何疑乎寔窅縣祀
典之常尊兮石豈泐乎一拳妄鍾山之金酒兮又何附
會於妖仙噫嘻南望蒼梧兮東上會稽九疑瀕洞兮窅
石悽迷秦之望兮低徊悲沙丘兮不西客有醜酒荒宮
而和之以歌曰稽之鎮兮南之邦紛萬國兮來梯航若
有人兮東一方酌余非兮薦余芳舞大夏兮象德泳東
海兮西江

海門山賦

以峭立如門終古無易為韻

唐周 鉉

大壑天接雙山闕如作鎮而巍峩對峙象門而中外皆
虛坼萬仞於長霄共持神秀納八紘之積水開閉靈居
合沓龍蟠連延壁立懸崖嶄萃而不動駭水喧阗而自
急每使盈虧之月向裏升沉能令蚤暮之潮由茲出入
故得周天柱作海門峻軋空碧高城混元奔疊浪而若
容車馬拔跳巒而似列藩垣常晴晝而纖露豁開大吞
江漢值陰霾而濃雲交翳暗鎖乾坤外布雄稜內施巖

嶠波聲相切以澎湃山狀並兮而竦峭呀吳伸越總舟
楫之隄防發電轟雷轄魚龍之衝要岌岌崇崇橫西截
東風濤莫犯乎永固天地將齊乎不終況乎據是水德
鑿非禹功海若抱關於其側陽侯擊柝乎其中彼岱輿
因顓頊漂流太行為愚公遷易一則屹要道而徒在一
則滔洪波而何適未若是山也專百靈捍禦表羣聖光
宅吐晴虹以為楣森古木以成戟故能咽喉水府掩映
仙都長鯨透而謂呈魚鑰曉日照而疑啓金鋪以嶽而

言巡八州而何有以門而視指三海而則無異乎勢壓
坤維氣連淮浦作巨浸含弘之閫為百谷委輸之戶所
以知開闢之玄功豈止亘億齡而窮萬古

遊越天門賦

元任士林

柔兆之春二月既望任子與客汎舟遊於天門之表於
時颶母停颶慎郎卷霽飛滂不興炭漫無際始則拖長
綃偃帆腹裴回蚌蛤之洲睥睨龜鼉之國少則掣掣洩
洩汎汎悠悠勑如雲逝蕩若漚浮浩不知蓬萊弱水之

在眸也洎余觀於漢裔渺一世之藟苴有石塘萬里鱗
鱗然隱波濤之下此殆祖龍氏之所鞭乎何其神也靈
洲瞥來絕島遙沒隆隆隱隱過大業天子之祠焉見其
君臣黼冕將帥鼓旗儼然牙樯錦纜銜尾而維也又何
其奇也昉二帝之所規悼生民之不幸身未死而變隨
顧英雄其何往於是停橈而思思窮而愁作噫嘻悲夫
客亦知夫天地之數廢興無常而孰執其綱絜不必擅
觸之強荊不必暢凡之亡江上之寂寂又安知非人世

之揚揚客遂鼓枻而歌歌曰擊蘭漿兮叩桂舳訪田氏
兮弔仲連數術不可久御兮鷲力不可謂賢然乎然哉
吾烏計吾身之久遭余迺敲脚唱小海以和之客復擊
節順流而歸不知舟中之有明月也

何山賦

元
宇文公諒

環蒼陽之諸山蔚金蓋兮深秀綠靡靡以旁圍青遙遙
而橫袤擅奇勝以覽觀紛應接於左右晉賢何楷於焉
讀書爰守是邦以遊以娛山因之以得姓人已往而遺

居是猶墩之有謝溪之有冉者乎觀其修林蔽日羣峭
摩天表金峰以前拱擁青塢而旁連步錦障兮雲麓聆
琴筑兮澗泉是雖地設實出天然靈祇獻瑞梵宇扃禪
閣流丹兮鳳翥瓦浮碧兮鴛聯華鯨鏗以響逸清磬發
而聲圓挂蒼猿於蘿磴棲白鶴於松煙若乃峰迴路轉
繡錯綺縟道場之勝境實相屬仰徹兮雲峰頻窺兮幽
谷羅旛幢兮杳靄韻簷鈴兮斷續巖花兮紛紅澗草兮
駭綠信造化之鍾秀實吳興之所獨是以梁則吳柳宋

則蘇仙或餞客以成詠或遊弔而綴篇或載於圖經之
舊或鑱於金石之堅悉班班而可考名與山而俱傳惟
我文昭倡導湖學振文鐸於東南羅佩衿之森若徹琅
音於冕旒構瓊材於榱桷封馬鬣於雲根山含輝而蘊
璞至於春秋致祭邦侯莅止粲文物之洋洋集衣冠之
濟濟黍稷馨香犧牲豐備嚴恭儼恪罔敢忽易奠餘分
昨乃復留憩或暢情於杯觴或寓意於山水垂遺典於
不刊實茲邦之盛事嗟夫水不在深兮有龍即靈山不

在高兮有賢即名憫異端之害正遽遺莽於荒榛賴天道之好還喜家璉之復青雖廢興之有數繇人心之本明雪汚辱於既往思搗穴而犁庭揭體用之昭昭破昏蒙之冥冥庶安定之何麓猶宣尼之孔林揆愚生之質質深有慕乎芳馨讀遺書以私淑每拳拳而服膺登諸山以騁望增感慨於中心時不可以再得聊抒意於斯文

天目山賦

明
盧 枏

吳王夫差畋於具區之野王孫彌庸驟乘大夫申叔儀
御王望見天目之觀截嶭嶂塘曾凌雲橈第鬱輪囷薄
乎中霄王命彌庸眡之對曰茲所謂靈祲也王曰靈祲
何如彌庸曰昔禹封九山含精畜雲觸石吐氣炭漫龍
鱗蜿兮獨上剡兮阬蒺紛紛紘紘莫知所以爾乃滋草
木旅禽獸叟儒怪填珍媾駢田隱爚萬物萌蒼疇昔之
見無迺近是於時申叔儀進曰大王察彌庸所稱纖憊
叅離巨體塌戾可謂剗造化之渣滓而曾於盛德之符

契者矣且夫維揚之澳碩人焱起翩兮若威鳳苞彩翔
秋旻矯兮若游龍凌倒景昇河津曉兮如日渥兮如雲
變化無方孰者為鄰伯啓毓於奇石傳說騎乎箕尾茲
山所以發精於哲耄作鎮於江汜若夫撫草菹之見禰
頰舌之談臣雖佻陋荒愒所不敢聞也王曰願為寡人
賦之叔儀曰唯唯惟吳后譽茲夏壤兮頽女繁其岑隈
竦旆隋之陵嶽兮遼菟紗乎邛峽陟翠微以嬖姍兮徑
造天之岨岫踞虎豹而繇眇兮純衆山之蔚嶠礧嶠催

灘之踉蹌兮岷矍矍而掩襲駁沅沅以輻輳兮巨石嶄
嶄之猶翻南嶼岵嶺橫山嶢嶢靈巖玉華鬱律萃第參
差波瀾揮援獠獫碧洞嶰澮它豁裕礪谿訝沕霏劫悟
俛眇傾崎嶇窳罄礪礪雕礪躡躡躡躡躡躡躡躡躡躡
盤亻于拉拖睢洩蹲鴟噉霍山下還眺層巒穢何煙煙
雲霞濛濛靖瑩天霄濇濇寂巖飄飄澹泖乘風瀟捎跼
如獸擾同若禽翺目不轉睞豔彩四暢滲淫襍襍莫能
形狀瀑布傍涌離潭瀦潞龍湫荻浦靈溪硤踏渥乎混

流汜濫躋往蹶崎石觸唐嶙嶭乎湓怒洶洶澎灩澦
澗濶狃齧鱗塹洩滂解解橫流紛霈潼沫高厲皤如白
馬偃紉羽蓋蜚俾咈喟汨汨去瀨憑陵碩壑確投雷礧
硤硤潏潏隱砵轟訇洶洶洶洶洶洶洶洶洶洶洶洶洶
瀕漂駛淼茫遠輸紆餘東逝永辭天墟潏沆潏潏安節
長浮漚瀾瀆淪瀆為後湖於是水蟲怪錯暴於洲渚龜
鼉蟾諸鰕鰻鰐鯨鮫人淵客呀呬齟齬魂魂鱗鱗踏還
傍仵珍木敷榮璘幽叢生琅玕翠情珊瑚艷呈偃仰岐

盼中揉目精灌林茵歲葩華掩會糾枝隴房樺櫛砢礪
仇離蕤飢風流掩藹隨波澹沲婀娜芴滉彩翠霞吸
精沆瀣纖柯嚶吟颺瀏慷慨經寃隕抑或象筌籟尋變
馳險八風肺沛憑虛聽響使人心憤靡隸矧父狄雉猱
然軀猥魑穀獬胡狎蜎獐斷坐嘯裂眚互瞰驚透護略
窳歷半散超嶢巖騰倚岸捷蒙茸懸絕澗羣獐狡健燦
兮若浮雲曾不可稱算周覽堂密隙隩瀾阨芳草靡施
秋蘭靡蕪唐蒙留夷鳶尾胡繩楚蘅江離裕裕絢絢綦

粼萋萋肝蠻閭夢芬馥勢披鷖鵬羣遊麇揚軀翼瞬視
嘲咋毳毳藻臆鷗子鷺黃鸝諸鷓鴣戴鵲石鳥鶯斯蒼
鵠輦散陸離戲遊山岳若夫琛希之賂金鑛涵朴雲精
燭光瓊支昭華璇英白珩藍田縹碧赤瑕流黃隈礨山
谷衍溢陂澍碕岸不枯林藪輝潤滋液融滴光彩鱗煜
於是乎嶽靈擁峙川后聯蜷百神焱籊僊僊煇煇泰乙
薦鴻祇御蜚廉翔蚩尤鶩靡蜺旌馳翠輅飈旋電掣陽
虛陰互煜奕倬僂萃於豐處鵠秀巖奇宣肩顯老瓌琦

偉長雙顴日表方瞳星爛鮐姿雲裊宏懿儼雅倣儻要
藐徊翔於道德之林獵弋乎神明之囿覽觀九族之有
亡與閭閻之變態錫羨餘恤不逮繕橋梁虞婚配裕後
昆揚昭代金紫壁耀冠蓋雲屯擬跡萬石越彩八閩然
後肆志乎遊覽履巍巍涉漫漫坐穹石揮五絃舞白鶴
泣玄猿曳綠邛之杖踐赤玉之舄浩浩乎葛天氏之唱
偃佺負局羨門安期或命石髓或翳紫芝相狎於洪崖
之涯洪河清昌光鬱麒麟遊鳳凰至蓂莢生黃龍戲泰

華砥嶢衡霍增醴風雲交通鼓舞忭會信壯乎天目之
大享靈長於億萬歲

小山賦

唐太宗

何四序之交運轉三陽之暮時風辭暄而入暑樹替錦
而成帷想蓬瀛兮靡覲望崑閬兮難期抗微山於綺砌
橫促嶺於丹墀啓一圍而建址崇數尺以成岨既無秀
峙之勢本乏雲霞之資承墜宇之殘露挂低空之斷絲
爾乃參差絕巘歲紆短逕風暫下而將飄煙纔高而不

暝寸中孤嶂連還斷尺裏重巒歆復正岫帶柳而合雙
眉石澄流兮分兩鏡爾其移芳植秀擢幹抽莖松新翠
薄桂小丹輕細影雜兮俱亂弱勢交兮共縈纔有力以
勝蝶本無心而引鶯半葉舒而巖暗一花散而峰明何
纖微之同景亦卑細以相成於是換浮歡於沉思賞輕
仁於勝地俯蟻垤而有餘仰終南而多媿非為固於九
折庶無虧於一簣聊夕翫而朝臨足據懷而蕩志

奉和御製小山賦

唐徐充容

惟聖皇之馭寓鑒敗德於前規裁廣知以從狹抑高心
而就卑懼逸情之有泰欣靜慮於無為於時季春移序
初光入暑露溽池臺煙霏林籩睿情悒以無歡懷仁知
而延佇思寓賞以登臨非搜麗於茅宇殊華嶽之削成
異羅浮之移所爾其表翫宸衷故作離宮含仁自下帶
嶮非崇分上林之卉木點重巒之翠紅葉新抽而不樹
花散植而無叢雜當牕之帶柳交約砌之珪桐纖塵集
今朝嶺峻宵露晞兮夕澗空影促圓峰三寸日聲低疊

嶂一尋風風輕兮拂蘭蕙日斜兮蔭階砌蝶留粉於巖
端蜂尋香於嶺際草臨波而側影石瑩流而倒勢雖蓬
瀛之蘊奇故未留於神睇彼崑閬之稱美詎有述於天
製豈若數簣之形託於掖庭俯依丹檻仰映朱楹恥巖
崖之鄙薄荷眺矚之恩榮期保終於一國奉天睠於千
齡

反小山賦

有序

金趙秉文

無塵道人李天英家海壖得小山寶而字之名曰玄峰

寢作於花陰月竇之間適甚為賦閒閒老人笑曰是猶有所待也若知天壤間皆吾几格間一物又何待輦石於山函花於鼎之為適哉乃為賦反之

嗟石來前孰形子鑄匪山而拳玉立巉然匪溜而涓玉痕隱然天臺卧雲海濱藉煙幾代子寶幾姓子傳子入吾室吾以子賢瓊花晚醉壁月夕眠我家我林吾以子便我學我仕吾以子遷子豈吾友吾不子捐石不能對請以臆宣自我之石幾世幾年山非吾名石豈子妍聽

其兩忘其樂天也夫鏡中之象亦水中之象瓶中之泉
即潤下之泉吾豈謂寶顧陸之華不若山林皆吾之畫
圖悅秦巴之音不若禽鳥皆吾之管絃子以心為物役
智為衆緣不知無塵之桎梏於一峰之玄也空花悞大
夫之夢庭柏証祖師之禪無一物之悲我君其問諸屏
山之散仙

掖庭山賦

唐
許敬宗

覽先哲之英華遊舊典之場圃善逾遠而斯應德既昭

而必溥見漢屏於睢陽驗周藩於有魯表商丘而作鎮
規楚室而興宇亦何代其無人諒吾王之邁古於是命
世作弼含章挺英允文允武惟誠惟明聽甘棠之暇隙
想叢桂之幽情瞰浮雲而志遠瑩寒井而神清乃命僕
夫整駕山隅騰鳴笳於通谷擁飛蓋於高衢逍遙仁智
之境放曠道德之區造中天而式宴陵倒景而為娛星
懸珠網日對金鋪雲承綺棟霓縈繡檻既而近矚玲瓏
遠眺溟濛隔翠微而半顯厯丹穴而纔通等玉京之仙

化侔銀闕之神功於時百卉敷榮六合清朗霞淡水而
川媚風飄林而澗響聳絕壁之千尋挂懸流之萬丈蔽
日月而孤峙吐雲霓而秀上循折坂而遶迴躡危嶠而
來往鑿離暉於石鏡法瑞露於雲掌爾其花藥芬披蹊
徑參差舒英冒渚擢榦臨崖乍莽蒼而橫植忽葑茸而
倒垂扇晨飈而裊裊含宿霧而猗猗蔭町疇之毛羣哢
間關之羽族或相賀於薨棟或競馳於原陸駒食藿而
馴場鶩含桃而出谷德澤加於飛走榮光周於草木日

云暮時稍閑暢神襟而體物紀盛跡以濡翰發詞林之
華藻瀉筆海之波瀾命小臣而並作賦大雅而承歡辭
曰芳園兮鬱鬱高岫兮峩峩君王兮遊豫軒蓋兮經過
花同林兮異彩鳥各嘯兮相和野獸鳴兮應鐘石山英
開兮間綺羅侍荆臺之入夢舞洛汭之凌波懸清暉於
日月同眉壽於山河

題山賦

唐司空圖

繭吾髮以羣嬉兮乃恣狎於林壑窘世路之榛榛兮匪

茲焉而焉託仰基矩之惟舊兮豈孱眇之彼度矧嶄紆
而還農兮亦靡勞於濬鑿壯神工之騁奇兮枉一峰而
中擢齟齬鼻而噓空兮湧佛螺而旁絡阜交蹠於艮隅
兮俯川塍而黼錯躋遺堞以仰眩兮洶瀑巔而電薄腴
卉木以駢昌兮藹葩屏而麝幄滋彩綵以紛翔兮玩韶
鮮而戲濯覩羣物之遂性兮澹吾躬而斯樂笑殊道以
狗強兮喜夸鵬而跼蠖雖穴處而志揚兮邈軒肆於宏
廓借家國之未忘兮鄙榮伸而陋約鏡身明而自勗兮

行與息而靡忤

囚山賦

唐柳宗元

楚越之郊環萬山兮勢騰踊夫波濤紛對迴合仰伏以
離迥兮若重壙之相褒爭生角逐上軼旁出兮其下圻
裂而為壕欣下頽以就順兮曾不畝平而又高沓雲雨
而漬厚土兮蒸鬱勃其腥臊陽不舒以擁隔兮羣陰沍
而為曹側耕危穫苟以食兮哀斯民之增勞積林麓以
為叢棘兮虎豹咆闕代狴牢之吠嗥余胡井眚以管視

兮窮坎險其焉逃顧幽昧之罪加兮雖聖猶病夫嗷嗷
匪兇吾為桀兮匪豕吾為牢積十年莫吾省者兮增蔽
吾以蓬蒿聖日以理兮賢日以進誰使吾山之囚吾兮
滔滔

後囚山賦

宋陳造

柳先生蛻迹中朝落身南州即囚山而命賦寫曾次之
幽憂讀者哀之至今心為之悽怵而聲為之悲啾房陵
斗州窮巖絕隘裂石廩之一罅瞰千室而斯在層峰疊

嶂自蜀而東亘二千里此焉未沫嘗憑高而舒望取羣
愁之一快拖頑蒼繚寒碧兮了不究其所屈騰陵勃怒
崩轟閭沓植則困縈則帶矗焉如邪銳焉如鍛馳萬馬
於曠莽翔羣龍於霏靄又似夫颶風之鏖萬艘翻濤瀾
於渤澥天雲若可手擘而日月為之隔闕嗟余與子胡
此焉仕案亦簿領庭亦卒史居無以泰吾心而遊無以
投吾趾時則誦柳先生之賦而知其有以也夫其猿顛
鳥仆窮號懾墮真挫犴之可駭也出不可入不可出

幽僻塊處荒傖癯民悍容而獐音日接乎前幾刻木之
與對也嵐昏滂朝黯掩暄晦僵人骨而酸鼻亭午未已
仡仡者病壯者廢由漢暨唐王公貴人悖而罪劣可矜
貸母此來之昧也自我解裝歲律甫遷向行止之坎流
今桺兕而鉞毬嗟若余子盤薄四年局不得歸欲語復
茹反諸己而靡愆袖長賦而見投慨今昔而潜然痛亂
山之見囚束寸步而莫前牢愁幽憤搢腸淪髓匪接摺
而踣頓不繼檻而掎止何高高之不仁而使我又至於此

也蓋嘗繹子辭究諸理子之所以惻愴而自悼我之所
以感動而促感者君子有弗是也彼漢唐之逐臣例庸
房之廢徙則亦干國之憲不容自己吾與子來其始誰
使非以其窮途之絕援資身之無策博斗升以飽饑而
逴死如庸賈之走荒裔罷農之守境塿曾不暇計去取
於彼此也邪以吾校子又進退之異趨齒髮之懸殊環
索吾中槁涸而空無彼子椰子跣劉躡呂豪韓與徒若
韋中立吳武陵之桀然方且望塵躡影蔑齊其驅彼其

一旦跼蹐於嵌巖嚴阻之幽深宜其號鳴悼惜不能一朝以居予之蠢愚質之樸疎才之卑迂萬非時須而遽乃顰顙悼中悄焉慘焉以賊和而傷生夫何為乎訊歸計於蟾蜍第圓缺之六七付古今於俯仰聽寒暑之更迭雖浩劫之悠長尚激矢之漂疾吾方左右圖史深居簡出揖勝友於南山斟春色於九室一不假犢背之書超然乎繫維繫攀之表非三花老仙孰其委悉子以吾言為何如余子謝之曰沈憂滯憊吾已失矣

羣玉山賦

以廓功峻登適
招外遊為韻

唐喬潭

穆王與偓佺之倫為玉山之會乃御雲輦張華蓋飛龍
駢駢和鑾鐵鉞警清蹕傳虛籟忽兮超遙漫若天外於
是乎徙倚西望逶迤北遊梁弱水跨瀛洲析若木以為
珮采琅玕以為羞俾幽荒窮僻有車轍馬跡經銀臺而
右轉肆玉軟以東適停羽儀乎此中觀仙聖之圖籍既
而浮莽蕩躋峻嶒神靈儼其高會容衛紛其上騰若光
若滅賁然來登觀其亭亭太虛不可彌度石室靈造玉

堂天鑿寶牒有融仙經惟錯蕩青簡兮綠字煥瑤緘兮
金絡虬以蚪龍拂之鸞鶴為列真之策府亦太一之延
閣覽之而羣聖會同拔之而萬古昭廓且藏書為寶鎮
物為雄小石林之岑峒玉樹之青蔥赫嘯嘯高崇崇
秘精義乎其中何必登隱弇拜崆峒挹方壺而訪道歷
秦望而為功者哉至如窮地之險極天之峻疊素九成
攢花萬仞非神轡之六駿孰能倏而驟進或歌之曰彼
天子兮塵外鑣登靈臺兮意飄飄吾君得道兮異於是

不日求兮自逍遙以石渠為羣玉之處幸校文之見招

羣玉峰賦

以玉峰聳峭鮮
潔新明為韻

宋田錫

昔穆王以閼苑希風宸遊縱目適玄圃之仙界悅靈峰
於羣玉乃顧謂祭公謀父曰斯山也拔厚地摩穹天含
珍蓄寶藏神宅仙軼銀臺之比峻踰太白之相鮮厯落
排空有處類巫山十二崖我倚漢有處如蓮峰五千朕
知卿之才者卿為朕而賦焉祭公乃拜手對敷揮毫應
詔心驚嶮峭情忘聳峭或勞想於璘玢或馳神於窅窳

以為一氣初判三才既生融而流者有四瀆之靈結而粹者有五嶽之名雖羅封而列爵謂生賢而誕英未若我傑出紫府高踰赤城虎踞龍盤聳圭璋而踈朗霜華雪彩皆琬琰之融明或孤而高或峭而絕或掩映以相翼或齷呀而半缺遠而望也則仙家青瑣含秀氣以玲瓏類而言之則春宴金盤點酥山而皎潔宜乎培塿玉壘奴隸圭峰藍關之英安足比於形勝荆谿之秀固亦陋其聲容若總而狀之則高者如飛欹者如恐背者如

卷二十二
遜向者如聳瑰姿奇態兮信匪尋常夏翠摩青兮可以
瞻奉祭公既筆不停綴辭妍若春賦詠既就箴規載伸
以為士林之羣藝圃之人有道有德有賢有仁琢磨材
能而益峻切磋名節而尤新儻一人之延納則多士之
來親穆王乃曰吾願益求賢哲比羣玉之嶙峋

沃焦山賦

唐吳融

域中公子問於方外先生曰蓋聞水之大也下環乎地
上浮於空無象無邊夷猶洪濛百派千流皆歸於東何

巨溟之深也萬古能容何九州之高也不淪其中先生
曰渾沌死乾坤始東西傾川澤委帝乃慮海旁溢俾山
中峙復孕以火用銷其水此沃焦之為義真宰之玄旨
者也請言其狀也巉乎萃乎赫曦乎翕赭乎陰陽熾炭
天地開鑪景風鼓吹赤帝規模成於妙有拔彼虛無處
冷能熟雖燔且濡於律則黃鍾取法在易則既濟相符
岝岬兮壓海萬里鴻洞兮烘天一隅液馮夷軋天吳鱗
介既難以潛伏草木安得其芬敷巨靈不能擘畏其爛

手愚公不能移憚其焚軀靈漲疑竭大室若枯爾其水
之來也浩浩爭奔滔滔不住蹴嶽推阜跳天沃霧暘谷
無地扶桑失樹雷奔潮走雪飛沫聚吞吐造化浮沉朝
暮一歸墟之積積既久而還盈一尾閭之洩洩不供而
旋注苟彼不為煎熬何物當其委輸公子曰夫萬物之
是非也當務所見無矜所傳不見五嶽各司一邊蟠地
極天吐雲含煙玉石產其下豫章森其巔高高下下縣
縣聯聯方面是傳祀典是先故無事則備王者之巡遊

焉有事則為國家之關防焉彼沃焦者存邪亡邪不知
夫去中國幾千其說何邇其功豈然先生曰古不可以
今論遠不可以近識至於先賢先聖有功有德或始火
化或始粒食或衣裳兆民或棟宇萬國其人豈見其道
何極但日用而不知固神化之難測抑又人之為意見
頻則不怪聞數則不驚只如跋烏玄兔迭代虧盈迅雷
烈風無形有聲北冰不泮南雨無晴方諸向月而水出
陽燧映日而火生鶴知半夜雞辨五更螟蛉化而螺贏

負洛鐘鳴而蜀山傾譚如詭妄驗乃彰明儻非目擊皆必力爭如沃焦者茫茫靄靄存於物外屹溟漲以獨立無丘陵之相帶何地能勝惟天粗蓋堯災是弭禹功是賴但以遠而不見貴以近而不見大何異乎曾參冠百行之首出四科而不載姬旦有再造之功為三監之相害有以見深藏若虛明道若昧只如高稱日觀靈號天孫曾瞻所重究鎮攸尊能攻善惡業召精魂何盜跖壽而幸何顏回夭而寃何富慶何貧原靈獸出何遭羈縻

之困海鳥來何獲鐘鼓之喧觀其倒置孰為司存又如
太華隱嶙上五千仞碧蓮若插高掌如奮然而設關太
東為城太峻苟一夫可守四塞可鎮終使險易恃而固
易憑而令驕易生而荒易徇懼則能安逸則成釁又如
嵐浮紫蓋秀擢朱陵北渚下壓南箕上承然而聚鬱蒸
限嚴凝鴈不可度人何以登其禍聖賢也則帝舜之遊
不返昭王之死無憑其殃忠讜也靈均有葬魚之痛賈
誼有占鵬之徵是非不辨正直何稱徒聞金簡玉書以

為貺九向九背而自矜又如幽并之墟畢昴之位岌崑
直上磊落相次然而藏趙符於上成無恤之不義產燕
璧於中假慕容之神器大蛇蜿蜒兩頭何異嘉穀蕝蕝
五穫何利旁扶跋扈之黨坐索彤弓之賜胡不懲革而
令馴致又如據天地之中央潤河洛之流光岿亭壁立
壓疊屏張而能降神表瑞呼歲呈祥控臨諸夏標準四
方若乃陳蕃竇武一時忠良為國除害其謀乃臧不獲
天助翻為賊戕劉聰劉曜恣意焚傷衣冠草莽宮闕犬

羊俯折地軸仰絕乾綱漢陽九以遽畢晉南渡而尋亡
曾何固護自倚青蒼月裏開宮但容童子雲中捻管唯
引鳳凰吁其拙哉彼五嶽者長未一分短以盈尺論名
則大責實何益封公封王用珪用璧邃宇崇館朱殷粉
白然識者視之何異沐猴而冠牽牛負輓者邪其次則
有非方非嶽亦怪亦神崑崙則樹珠田芝蓬萊則闕金
臺銀周王迷之於轍迹漢帝感之以禮禋荆山美玉獻
不遇君隴山鸚鵡語或陷人嶰谷有竹條舒不均嶧陽

有桐清濁強分姑射何靈如冰如雪巫陽何感為雨為雲怪山何怪飛來至越慶山何慶湧出於秦若然則遠者近者大者小者如沃焦之功實冠於天下何以名邪至於南面巍巍安尊定卑建邦設都來蠻走夷其為武也有干戚鈇鉞其為文也有俎豆罇彝齊紈越絮暖必如斯周禾溫麥飽必以時胎化卵育手捉足馳其奉生也有歌鐘管籥其事死也有棺槨幌帷詒子詒孫固本崇基苟懷襄之不止皆墊溺以何之若然者不惟九土

潰而全墮抑亦三光蕩而崩離則堯舜禹湯之道沒不
傳矣周孔楊孟之文又安存斯况乃上無灌木誘良工
之斤鑿下無靈黿招巨人之釣索不栖翠羽飾綺被之
彩錯不孕明珠供魏車之照灼不滋金鐵起兵交惡不
穴經鯨吞舟恣虐吉凶莫知威福寧作誰銜肝蠻誰藏
冥寞所以貞珉翠琰却絕罔錄桂湯蘭肴何嘗約略固
不復邀物以白犬白雞媚人以靈草靈藥但超世以崔
嵬為普天之銷鑠於是公子愕然如失起而謝曰儵忽

之神能鑿人耳目俞盧之術善治人膏肓向者聞衆人之論浩然若涉津之無梁今也聞吾子之論燿然若披雲霧而覩太陽恨不能凌風雲乘混茫快意極觀勒銘其旁噫有名之祀所在感彰至於山魅射影水弩為創鴟夷鼓怒耕父激揚皆霑沃酌不乏馨香何茲山也橫絕於萬代不遇於百王將無時如孔子豈獨行於務光近者秦階未平四郊多壘貳負尚活三苗未死水仙則多陷齊人米賊則半驅妖鬼室散機杼田拋耒耜郎官

困採橡於野將卒貧鬻薪於市霧足妖興雲多陣起既
走羣望猶懸帝祉豈褒崇之漏彼致災害之如此方今
封有功而爵有德小不遺而大寧弛蓋九重深執事者
未聞於天子

沃焦山賦二

以蕩熱翻空此
焉銷鑠為韻

唐
吳融

海之大也吞乎百川百川不停也海將溢焉伊元化之
相制屹崇山之暗然不知乎何代凝結沉潛積熱廣陂
陲高截嶽嶽止不死煙生莫絕瞳矐兮想二氣之爐中

烈沸涌兮疑九州之鼎下熱當長鯨之鼓跳此歟爾以
潛銷雖巨鼃之噴躍亦倏然而盡鑠滲若一空呀如四
涸得非火井通其腹且孰問其穿鑿當是燭龍蟠其根
又誰覩其照灼但耗溟渤自橫寥廓莫不屹屹崇崇燂
虛燥空向曙而晴霞助赫連宵而陰火相烘如欲以燬
鮫室災龍宮雨露既難以澤草木安得而豐遂使乘槎
之人莫敢沿洄其側銜石之鳥無因栖息於中是知陰
陽之變也本自相形動靜之用也歸於相養苟喬岫之

無作則柔祇而必蕩若然者堯之水不止乎九年之多
禹之功難均乎四海之廣彼稱神稱仙者有十洲之繁
封公封王者有五嶽之尊縹緲而雲霓自爍崢嶸而日
月爭翻徒充覆載莫補乾坤曾未如千仞獨高衆流皆
委非煎熬之不怠則墊溺而何弭所在雖遠厥功難弛
有能光祀典於吾唐宜褒崇於此

瀛洲賦

有序

明
羅喻義

瀛洲之山遠在東海粵若稽古圖牒所陳洲名者十山

名者五壺名者三瀛皆與焉亦猶冀方總九州泰岱宗
五嶽矣顧跡涉怪迂匪賦何顯匪徵何言是用借漢為
喻終之以雅云耳辭曰

赤堊降青雀下武皇作開金馬東方滑稽相如文雅有
詔問朔積水焉極孰知其坻神洲有十疇者神奇抽子
祕思騁子妍辭遠想冥搜為朕賦之朔拜稽首丕惟曰
於戲休茲豈不異哉八方之外巨海之埃玄都紫府玉
樓金臺遵渚則有青丘鳳麟陟嶽則有方丈蓬萊何衆

嶼之競奇而一壺之玄勝雋八洲而先鳴殿四山而後
勁於稽其位厥惟東海西直會稽七十萬里地傳木公
則諸真之祕館焉方乘震帝則羣山之隩墟焉昔余望
於遠海睇彼蓬瀛登於衡山刻石作銘曰寶雲生於露
壇祥風起於月館望三壺如盈尺覽八紘如帶綰余風
蘊此奇尚兮東入海而徜徉飲黃露於玄天兮飴丹霞
以為漿朝發軔於朱陵兮夕余屆於扶桑維彼瀛之哉
葉兮羌上廣中狹而下方類太華之削成兮宛在水之

中央展其為大也恍其為怪也懍懍不可為容閃倏不可為槩也爾乃六龍扶日而上升五鼇冠山而番休人民隸籍而皆仙禽獸彌望而如荼山川髣髴乎中國風俗依稀乎勾吳神芝曄曄而擢秀仙草油油而芳粵乃有玉石千尋魁然其阜下吐醴泉味甘如酒數升輒醉後天並壽既旨且多酣飲則那余竊樂此據地而歌之歌曰天清地曠渺難望滄天蕩蕩浩蒼蒼百齡暫寄何許長請為婆娑玉石傍酌泉如醴行羽觴令君長生壽

而臧此中玄超非醉鄉黃金作闕芝產房千秋萬歲樂
未央據地未起載歌玉醴歌曰玉醴方潔甘且清有道
服者得長生挹彼注茲可數升陶然常作醉中醒念茲
綢繆樂不淫何當漂泊從伊人惟時相如大夫有睟其
容執簡而進曰吁咈哉異乎所聞方今聖明在宥化洽
隱淪西有太液三山東有玉堂璧門所謂瀛洲即此其
真矣何必求之方外而問諸水濱朔言非是臣請為亂
以正厥事亂曰太液兮蓬瀛玉堂兮璧門山有木兮水

有漣匪集仙兮而集賢羣龍兮躍惕翼君王兮永世

江上之山賦

梁江淹

潺湲潏潏兮楚水而吳江刻畫嶄峩兮雲山而碧峰挂
青蘿兮萬仞豎丹石兮百重嵯峨兮巖罅如斲兮如削
嵒巖兮尖出巖岍兮空鑿波潮兮吐納嵒峰兮積沓觸
鱗兮赤尾龜鼉兮隘匝見紅草之交生眺碧樹之四合
草自然而千花樹無情而百色嗟世道之異茲牽憂恚
而來逼惟鑪炭於片景抱絲緒於一息每意遠而生短

恒輪平而路仄信懸天兮竊昧豈繫命於才力既羣龍
之咸疑焉衆狀之所極俗逐事而變化心應物而迴旋
既歎翕其未悟亦緯繡而已遷伊人壽兮幾何譬流星
之隕天悵日暮兮吾有念臨江上之斷山雖不敏而無
操願從蘭芬與玉堅亂曰折芙蓉兮蔽日冀以盪夫憂
心不共愛此氣質何獨嗟乎景沉

林表吳岫微賦

唐冷朝陽

楚江之陰巖壑重深參差遠岫掩映遙林帶殘霞之隱

隱含暮景之沉沉聳孤峰之萬仞擢喬木於千尋仰之
彌高倚青冥而直上瞻之彌遠凝黛色而傍臨牕微明
而可見雲出沒而無心微雨新晴陽鳥乍曉芊芊芳樹
歷歷飛鳥森羅廣澤之間半出重林之表天高地遠混
煙靄而雖微虎踞龍盤等衡巫而不小形標迴漢勢壓
全吳衆鳥所託羣仙所趨林隔岫而相映岫依林以相
扶幽蘭所生知其芳矣仁者所樂不亦悅乎春思感於
春情遠林馳於遠岫心悠悠以遐想色遙遙而層構度

材任土挺翹楚而敷榮蘊玉藏珍分嶽壑而增秀信乾坤之覆載承雨露之繁茂當峻極於長空豈蔽虧於側陋蘭青青兮雨霏霏望鄉路兮吳山微折芳懷遠兮送將歸桂枝片玉兮生光輝

牕中列遠岫賦


以山遠而見如在諸掌為韻

唐張仲素

仁者靜而自閑高其居而閉其關爰開牕以列岫若施障而圖山邈彼黛巘當於其間至若虛牖洞開連峰向晚雲無心而迴出鳥厲翼而孤返初疑鏡裏覺萬象之

俱深又似壺中見三山之尚遠洎如雨歇原野風開薄
帷天道不窺而自見山光遙麗而增思謝守臨齋以觀
詠之不足陶公開卷則知室是遠而若薜蘿之在眼方
坐嘯而堵頤杳杳雲峰既自中而翫矣蒼蒼海嶠亦孔
昭而見之况復彩翠之容朝昏是變將避俗以無悶殊
近知而守見簾光乍入增松雪之微明砌竹旁垂助林
巒之蔥蒨夫其牕也或飾之以青瑣交之以綺疏想取
榮於爾室非助境於吾廬鑿垣而疊嶂遙列寓目而幽

襟必舒偶琴酒之樂只泯色空之豁如且彼植木翫芳
者有時而改累土為山者有時而始曷若曲肱隱几事
幽功倍垂碧紗而嵐氣共凝卷宿霧而翠屏常在是知
事有親而逾失遠而匪疎徇利爭先之徒固難知也逃
名小隱之士或近沾諸亦何必尋赤城之標究蓮峰之
掌彼垂堂而是冒此自牖而可賞山中人兮誠不在於
獨往



御定歷代賦彙卷二十二